

祠


部

集

六







祠 部 集
(六)

強 至 撰

編主五雲王

編初成集書叢

集 部 祠

冊 六

中華民國二十四年十二月初版

撰 者 強 至

發 行 人 王 雲 五
上海河南路

印 刷 所 商 務 印 書 館
上海河南路

發 行 所 商 務 印 書 館
上海及各埠

美

二五四〇上再

商

祠部集卷三十

書

賀樞密相公書

按璇衡而考度。維斗建寅。揭象魏以班常。俾民觀治。恭惟樞密相公。助高盟府。道濟治朝。才兼文武之資。身繫安危之重。樞廷制勝。以坐鎮于四方。宸扆仰成。茲奮熙于百度。維春祺之所嚮。與歲歷以咸新。某職總計臺。跡疏材館。徒切壽康之祝。阻脩謁對之儀。

賀樞密太尉書

恭惟樞密太尉。元龜先識。隆棟巨材。日宣九德之常。坐制五兵之本。廟謀密勿。已躋天下之安。邦禮論思。愈祕省中之語。遙臨元朔。翕受蕃禧。某總計使臺。馳誠賓廡。瞻風滋劇。介壽無階。

賀省主蔡給事書

蒼靈布序。華歲闔端。肇二氣之泰通。資百昌之咸遂。恭惟首主給事。才包王佐。道貫民彝。名躋日月之高。學破鬼神之奧。瞻中郤之調度。坐懋豐功。渴四海之儀刑。行膺徽冊。發春茲始。介福攸同。某蚤託下風。適提外計。徒敍誠於竿牘。阻馳慶於庸門。

賀省副郭郎中書

恭惟省副郎中薦紳碩望經世偉才蚤登要路之華時各甚盛進貳甘泉之掌風績其凝五始遙臨百祥攸召莫遑爲壽第劇馳誠

賀省副王郎中書

恭惟省副郎中惠和秉哲通裕標才貳職大農兼正列星之位升華近著靡需累日之期順履王正永綏天祿瞻祈并切鋪述奚殫

賀省副兵部書

恭惟省副兵部蚤紆賢業親造聖辰進位五兵兼造財闈之劇疇庸六典卽登法從之嚴順履一元載蕃百福莫前脩慶第切馳誠

賀中丞唐諫議書

恭惟中丞諫議體凝方重學貫本元危言嘗犯於雷霆直氣欲摩於星斗一誠獻納愈爲朝論之高萬事脩明遙底臺綱之正始和戒旦茂祉對時某素被重知適膺煩使茲阻壽觴之奉曷勝頌牘之虔

賀郡牧龍圖呂侍郎書

恭惟郡牧龍圖侍郎玉璜茂閎金鉞慶枝親逢聖神之期自底功名之會文昌貴秩矧兼延閣之華法從邇聯暨屈劇司之委遙臨元朔益介純禧某總計河濱馳誠門下永言企頌曷盡敷論

賀判都水兼龍圖韓給事書

恭惟判監龍圖給事。世推人傑。道覺民靈。步瓊闔之榮班。直珍圖之延閣。智謀有裕。繫臨長於水官。績用其成。行對休於天子。維時開祚。與國均休。某久去朝聯。方提漕節。莫前爲壽。敢後馳誠。

賀新推官書

茲者某官。茂對宸縉。榮從賓幄。顧短才之有望。幸婉畫之焉依。方列慶音。遽貽珍牘。俟諸瞻揖。併述欣銘。

答監稅李學士書

伏念向繇幸會。獲際光儀。鎮執計簿之勞。絕攀臺閣之軌。封壤雖密。絨膝幾稀。伏惟關掌多餘。神明自復。恭以某官。道先民覺。才爲世生。由妙年而取甲科。不累日而致清貫。書林擢職。誠允公言。利局冗寮。固非久次。靡容秩滿。行被詔還。

代賀監司書

伏以華歲履端。蒼靈布序。審璿璣而考度。揭象魏以頒常。恭以某官。康濟懋勤。融明迪哲。入膺宸綍。出領使麾。方首祚之丁辰。逮屬城而蒙福。永言慶祚。曷任下情。

代賀諸官書

伏以蒼靈布序。華歲履端。揭象魏以頒常。審璿璣而考度。恭以某官。早紆賢業。茂著官能。屬首祚之膺辰。閱自天而集慶。永言瞻頌。曷究敷宣。

代賀呂度支改兵部糾察在京刑獄書

伏審顯膺鴻渥。榮改清郎。矧辱已知。倍增距躍。恭以某官。搢紳碩望。當軸慶宗。親會穆清之辰。累更繁劇之任。進夏卿之秩。方啓於榮途。悉君子之心。以繩於庶獄。佇歸柄任。少副輿言。伏望上爲闕廷。精調寢饋。

與鄉中親知書

某一塵科籍。久偃鄉閭。制除調官。闕滿之局。率繫仁庇。備歷亨衢。銜恩固深。論感非悉。旋營職之鮮暇。致拜音之後時。恭惟順履新陽。誕迎景福。江關千里。已遠於高賢。塵土三年。遂淪於俗吏。未諧諮覲。第極傾翹。

上通判元太博知縣葉太博書

昨者。久偃鄉邦。屢登牆宇。素昧業官之術。多所乞靈。每由請見之間。未嘗無誨。泊遠從於吏役。俄越去于公廡。日戶鞭扑之冗。不覺音滕之曠絕。仰惟德履。坐擁休祺。恭以某官。道具粹醇。器函剛實。曲臺掌故。未愜於輿言。片紙垂褒。佇歸于柄任。俛維孱儒。鎮託甄題。伏望上爲邦朝。益綏寢饋。永言瞻頌。曷究指云。

問候府推張都官書

自阻賢規。曠馳書舍。屬寒威之方厲。諒時社之載蕃。伏惟某官。名重儒林。學優聖域。關決都畿之政。聊藉治才。延登經緯之華。行膺睿選。餘祈自厚。少副勤瞻。

代問候發運主客書

近者。伏值駕言屬封道出賤土。幸階守紱之職。屢叩賓閔之嚴。使車還轅。倏爾踰月。官簿堆案。缺然寓音。

伏惟順履新陽。誕迎景福。幹濟多裕。神明頓遠。恭以某官。文章世家。忠諒許國。不由累日之久。力取顯官之榮。上知素明。自結益固。然外臺分寄。誠壽於具瞻。而中辰須賢。行聞於爰立。

代上持服魏諫議書

某自叨朝寄。出領州麾。聿有詔條之奉行。寢焉音問之稀闊。仰惟孝履。俯順禮經。恭以某官。元精所生。盛德之後。躋諫署之祕列。將漕臺之重權。中外游揚。屯夷一貫。方隆帝辰之眷。遽遭親堂之悲。頗壽與瞻。尙淹册拜。矧萬鍾及養。足少抑於哀摧。儻細札奪情。可兩全于忠孝。伏望上爲邦社。精調寢興。

代問候發運主客書

近日。伏值出按屬部。俯經賤封。繇天幸之使然。獲風期之觀止。去德未幾。嗇神諒佳。鎮鞅簿書之煩。絕疎竿牘之問。仰跂標範。第勞悃悵。伏望上爲邦朝。精調寢餼。永言瞻溯。曷罄敷云。

代上持服魏郎中書

某逖阻朝遊。鎮糜郡事。曠奉聲問。仰諮燕輿。恭以某官。才貫幾深。量函夷雅。親逢真聖之運。早踐列星之垣。方不世以懋勳。遽終天之遘戚。然德雖欲報。靡極於孝思。矧忠亦可移。庶全於禮制。

上和州余郎中書

近列慶函。繼紆誨牘。倍聆德履。舉集休祺。恭以某官。植操端方。秉心純亮。紫垣應宿。早歷於清郎。秀野班春。聊熙於雅俗。行膺宸選。少慰人言。伏望上爲邦朝。精調寢餼。

上通判太博書

近獲布音。嗣蒙占教。伏審贊行藩政。坐擁天祺。恭以某官。親會泰辰。游揚美仕。曲臺進秩。矧故事之素明。別乘亞恭。猶清議之未允。佇歸柄任。方協輿言。

與海州倅書

出承吏乏。阻備賓榮。當淮洲囂冗之衝。有官簿沈迷之慮。營職無狀。貢書不時。恭以某官。文章世家。忠諒許國。副車貳政。尙鬱於賢圖。細札須才。行膺於帝簡。

上糾察呂兵部書

近日。嘗貢賤賤。計塵几席。惟按治之多暇。固尊生之有經。恭以某官。當軸令枝。薦紳碩德。早被上心之簡。總詳庶獄之繁。踐往訓之哀矜。莫非慎察。體至仁之欽恤。多所平反。矧陰施之已隆。諒寵褒之非晚。

上審刑李屯田書

鎮糜郡事。逖阻朝游。曠敝暄涼。仰諮寢味。恭以某官。道先民覺。氣秀人靈。早頡頏于仕途。尙淹延於郎署。虔共職事。慎審刑章。抵罪之氓。賴盡心而蒙惠。舞文之吏。皆束手而憚威。矧治狀之有成。加聰聞之甚邇。行甄善課。驟陟清班。

答本州都曹書

自去故棲。向從遠宦。豈圖謙眷。特損音題。恭以某官。植操端方。賦才肅給。勾稽一郡。適藉於幹能。第課三

年行膺於寵擢。永言感頌。曷究指云。

答朱判官書

某自把守麾。曠馳書舍。豈圖高誼。先枉長牋。伏以某官。名世標才。際天蘊識。泛蓮之幕。夙表著於能名。恭梓之邦。洽聽聞於政迹。行甄善最。驟陟清途。永邇傾祈。曷殫崖略。

本縣孫長官書

言念自分符竹。久去鄉粉。舊業一廛。幸棲於仁政。順郵百舍。遽損於誨音。紉玩載周。銘藏無斁。矧夙凝於治狀。固上格於聰聞。行迓寵升。倍祈珍攝。永言感頌。曷盡文陳。

代答濠州監稅李學士書

言念竊居藩守。幸邇風猷。如隣洪河。日所蒙潤。不遠數舍。缺然寓音。豈意謙攜。猥貽勤教。暫屈才於利局。行還職於書林。庶順生經。以須詔召。傾祈感篆。匪諭名言。

代上濠州呂學士書

某叨紆守紱。密接侯封。斗疎順驛之馳。日企餘光之及。仰惟坐鎮。俯順生經。恭以某官。文章冠時。纓冕奕世。早躋閭籍之華貫。復列書林之貴遊。鈴閣班條。寧容於滿歲。鋒車祇召。行在於匪朝。

代上糾察呂兵部書

某向糜州守。逖阻朝遊。雖順翼之數通。顧高風之負邈。仰傾德宇。鎮役勞襟。恭以某官。天鍾粹純。世濟勤

業上方倚注。允得民獄之平。時所企瞻。知爲相門之後。行旌善最。峻陟清途。伏望上爲邦家。精調寢饋。

代上發運待制主客書

某自邈崇塵。條經累月。阻奉音郵之問。仰諮德宇之安。恭以某官。器函淳深。術蘊經濟。以外計浩穰之委。暫掌于吏權。矧中宸眷倚之隆。行當於柄任。

代上提刑郎中書

某近貢音滕。仰詢韻宇。惟按治之多暇。固尊生之有經。恭以某官。親遘泰辰。游揚美仕。提綱庶獄。絕吏手之舞文。嚴課中宸。竚上心之嘉績。伏望上爲邦社。精調宴興。靜言翹挹。曷究指云。

代答丁舍人書

郡卑地要。術短事繁。阻奉音函。遽頒教幅。受而伏讀。藏以爲榮。仍審燕興。舉臻禧福。恭以某官。學造聖際。行爲士宗。親逢盛期。獨映華貫。然禁塗載筆。曷究澤民之爲。而台袞輔謀。佇觀行事之效。

代答祕監書

嚮領外塵。遙瞻上笏。豈圖恩獎。首占教文。伏讀以遠。兢慚靡措。恭以某官。懿文表世。亮節在庭。中外游揚。明哲一致。台衡著德。方渴於老成。仙室需才。寧容於歲滿。

代上徐舍人書

伏審光奉宸緝。榮持使柄。伏惟慶慰。國家以外臺至重。列郡攸儀。澄序庶官。以判白於賢否。總領大計。以

供億於經常。僉謀所同。明哲惟允。恭以某官。業術精奧。方格淳修。臺閣清塗。聊抑翺翔之勢。金穀重寄。適繫幹濟之才。行被詔音。驟還柄任。

上昌樂縣官書

近觀風期。過承禮遇。旋經違異。頗極傾依。到郡少閒。致書差緩。餘祈清霽。以迓寵恩。感頌之私。文陳匪悉。代上上省邵金部書

伏自拜命宸廷。貳權計省。官簿紛委。使郵絕疎。曠敝暄涼。仰諮燕起。恭以某官。方格修整。業履該明。解塵通漕之臺。遠甄最狀。亞職甘泉之府。允屬時才。矧心計之素明。加聽聞之甚邇。行疇幹濟。亟步近嚴。

代謝知州書

近者。祇被宸綰。奉安親樞。暫還素里。數觀清塵。備蒙主禮之優。過篤朋從之好。旋違德宇。適抵治封。方休道路之勤勞。卽有詔條之宣布。傾賢惟日。裁寄後時。矧風績之其凝。佇恩意之不次。尙遙晤對。倍冀遵頤。答仇員外書

早綴下科。寢階冗列。備聞高誼之日久。願見盛德而跡疎。近布勤倦之辭。倍摠傾嚮之意。兢畏太甚。舛誤有之。妄指趨廷之賢。謂爲同籍之契。陰須嚴斥。絕覲好音。賴長者優容之深。出小生意料之外。懇諄其誨。矜恕以情。置書袖中。永以爲佩。負荆門下。勢所未能。恭以某官。名高士林。學造聖闡。平時沈俊。領民籍官簿之繁。疇昔著篇。極國體人事之大。行膺褒陟。倍保燕興。感頌怔忡。曷殫崖略。

代賀范大資移鎮書

某以孤生。嘗棲大庇。亟蒙教育之賜。有警懦屏之姿。尋違遠於師牆。鎮奔馳於吏牒。緒言不及。夙習幾還。賴天不棄。愚賢方易。鎮復幸使麾之屬。適當官次之依。善政所施。可日聞於矩矱。短才無狀。庶訖託於生成。恭以某官。鉅業熙邦。雄文表世。出平亂略。入總繁機。挺金石之純誠。尊股肱之一體。輟從祕殿。往領巨邦。已躋雅俗之安。靡俟更書之滿。朝端英袞。行被於登庸。天下蒼生。一歸於陶冶。畢宗臣之能事。光信史之直書。瞻頌傾依。曷殫崖略。

代謝柳侍讀書

特紆公幹。垂貺鈞函。俯親小國之隣。曲損大臣之體。拜而伏讀。藏以爲榮。恭惟臨撫善藩。綏寧泰宇。伏以某官。民靈先覺。王佐偉才。以文章取甲科。以忠誼結明主。華要之選。翺翔殆周。厭預玉堂之游。出領銅符之寄。諸侯之府。矧坐鎮之彌年。上相之廷。行登庸於匪日。

代答劉龍圖書

近塵愚悃。上浼台光。豈謂損體貌之達尊。錫丁寧之勤誨。惕焉拜賜。藏以爲榮。恭以某官。迪操直清。秉心忠諒。公論加重。主知甚明。尙淹當軸之才。聊寄尹京之任。王都億萬之口。翕頌政聲。相階比兩之躔。行膺册拜。

代上文相公書

託身播物之鈞。生成有素。延首翹材之館。景仰無涯。日爲吏簿之勞。時闕公函之奉。伏惟變調元緯。集受純禱。恭以某官道著將明。量函夷雅。秉尹躬之一德。會舜旦之重華。雲龍協期。圭袞旌德。丹青教化。蔚爲百辟之師。富壽幅員。靡失一夫之所。太平之業。夙夜以基。

代上向少卿書

伏審祇函詔音。榮解使領。孤危晚景。遠遠巨庥。貌如嬰兒。驟奪慈母。叢若疲馬。止思故軒。遐企恩暉。第零感涕。承使旌之就道。阻信服之把麾。敘戀莫前。馳想良極。恭以某官。搢紳碩德。當軸慶枝。幹厚利於邦家。已殫幹略。暢偉謀於圭袞。行被寵恩。

代上文相公書

用人惟舊。鈞宰焉依。亞外諸侯之麾。鎮嬰俗狀。瞻大丞相之府。阻拜台光。伏惟密贊萬機。翕膺諸福。恭以某官。清廟偉器。朱紘正聲。伊尹以道覺民。靈山甫以職裨袞闕。結帝辰之隆眷。踐公槐之絕班。熙然吾氓。登躋仁壽之域。致我真主。拱揖勳華之隆。百辟所儀。四海共賴。

代答呂郎中書

近者。伏值某官。駕言于藩。道出茲土。獲風期之覲止。蓋天幸之使然。展奉良疎。緬懷甚覲。豈圖高誼。先枉珍函。何其賁飾之多。無乃謙撝之過。兼聆近履。舉集龐視。班教善藩。行據於素蘊。拜嘉褒詔。佇陟於清塗。

代答陳太博書

伏審解麾炎服。假道淮邦。惕賤候之未能。遽郵音之首及。俛惟弱植。嘗預同升。茲天幸之使然。將風期之觀止。拜塵有自。引領增勞。恭以某官家世名才。朝閨碩彥。曲臺進秩。矧故事之素明。片紙垂褒。諒茂恩之行集。併須瞻拂。以訖惓惓。

代答荆南知府齊學士書

伏審茂對恩函。榮躋仙局。伏惟慶慰。竊以國家興敝。祕館延登。偉才特優。承學之賢。乃建載言之職。其應華選。允屬名儒。恭惟某官。學造聖微。識探經奧。大筆擅淵雲之妙。卓富於高文。當年飛終賈之聲。早光於上第。對休辰而逢吉。揚顯仕以開榮。參計財闈。茂明經畫。宣風漕節。多所澄清。邁升史席之華。兼領守麾之寄。矧洞庭之樂土。惟荆渚之雄藩。民物素佳。江山尤勝。優游郡閣。足詠中和之篇。陟降王塗。行歸侍從之列。某側聞新命。竊忭寸襟。惕賀牘之未馳。遽誨音之首及。永言感躍。曷究指云。

代問候海州知州書

近被臺移。遠承官乏。企仁侯之幕下。時戀恩暉。供冗職於淮壖。日馳俗狀。門牆且邈。賤牒弗時。伏惟鎮撫善藩。綏寧泰宇。恭以某官。郎垣碩德。王國偉才。領麾滄海之城。豈容滿歲。奏課甘泉之府。行擢茂功。

回徐州通判都官書

向者。某官久偃鄉邦。屢親標矩。同心相得。喜接高賢之遊。交臂分攜。鎮供冗吏之役。奔走道路。淹回歲時。馳塵想而彌深。奉幽緘而久缺。豈謂弗爾遐棄。兩貽好音。惠愛逾周。雅素皆在。仍審貳藩之暇。益臻素履。

之和。海沂泰康。已騰於輿頌。緋紙迅召。行陟於嚴塗。

回慶成軍高郎中書

伏審紫詔承恩。粉闈正位。伏惟慶慰。恭惟知軍郎中。才猷膺劭。術業修明。刺史承流。方登於最狀。郎官應宿。遽服於華章。軍壘班條。連上頻年之最。星垣進秩。載光列省之文。首祝音函。第增感臆。

與商州閻修撰書

審擇剛辰。已班寬詔。卽商於之便郡。脫炎服之修塗。章懷近買臣之鄉。失馬誠寒翁之福。而況屯夷殊致。明哲惟均。想宣化之多餘。固養恬而增粹。行膺迅召。還陟嚴塗。

代回史祕校書

文試有司。業精諸彥。光外臺之舉首。大華閣之慶餘。垂矚長牋。益欽高矩。卽收名於上第。當得意於青春。餘冀自持。以須大到。

回慶州鈐轄梁文思書

參領戎輶。往臨邊劇。喜獲賢規之接。顧慙主禮之疎。旋審涓辰。已諧視事。首紆榮翰。增戢鄙懷。方外圍之倚才。佇中朝之紀績。餘祈厚愛。以對華褒。

上亳州宋內翰書

恭以某官。學際天淵。名重纓綸。早陪乙夜之覽。允極千秋之榮。謂翔步王塗。未殫行事之效。而班條侯屏。

少見澤民之爲。順履慶辰。具膺景福。宅上台而秉軸。諒在匪朝。祝南山而奉觴。莫遑爲壽。永言瞻頌。曷究名言。

上揚州錢侍讀書

恭以某官。元精所生。盛德之後。紹該洽之先業。陟廉良之茂科。華要游揚。聲光愈綽。密侍鈞衡之覽。遽厭晨趨。樂從露冕之遊。已凝風績。靡容秩滿。行被詔還。屬亞歲之膺辰。固自天之集慶。某按封茲限。爲壽莫前。瞻禱所深。名言非諭。

上江寧府皇甫諫議書

恭以某官。莊重自居。直清不倚。間關數紀。出入兩朝。寔隆法座之知。峻陟諫垣之祕。典刑在事。方倚老成之資。藩翰于宣。遽布中和之治。順迎令序。誕擁龐禩。瞻頌所陳。名言非究。

上杭州呂舍人書

恭以某官。道具粹醇。體凝方重。早躋仙籍之甲選。久陟禁林之貴游。英袞之暢。偉謀尙淹。大任。晝錦之過。故里。聊請便塵。某適按部。封正遙牆。宇祝南山而爲壽。莫遂前趨。託兼幅以貢音。曷涯下悃。

上運使工部書

恭以某官。王國美才。郎垣碩德。荷續旒之隆眷。方倚兼能。領金穀之要司。尙淹致遠。行疇最狀。驟陟嚴塗。順履令辰。誕膺景福。某按封茲限。爲壽莫前。瞻禱所叢。名言非諭。

上發運大諫書

恭以某官夙鍾間氣親邁熙辰。翺翔要路之華。聳動薦紳之望。以至兼諫署之嚴密。總漕臺之劇繁。給食中都。暫繫於心計。秉鈞上笏。行被於詔音。屬亞歲之膺辰。固自天之集慶。某久違賓次。往按刑章。爲壽莫前。瞻風茲劇。

回梁文思書

一別河濱。歎離羣之久矣。相逢關右。幸道舊以懽然。旋復睽違。方深企嚮。遽貽書好。益固襟期。伏惟某官。才武絕人。忠勤許國。適領兵鈴之要。行收邊闔之功。倍順節宣。少符瞻禱。

上察院書

恭以某官文爲國華。道先民覺。雍和朝弁之貴。暉映士林之光。佐邦漕之劇司。適資心計。兼臺綱之要秩。允稱恩章。行旌幹濟之能。驟置凝嚴之列。順迎令序。誕擁純禧。爲壽莫追。瞻風徒切。

代回江東轉運張學士書

自阻風期。倏彌年所。沈迷官簿。常若少閒。臨按屬封。曾無虛月。因廣牋函之奉。仰諮燕餽之安。豈謂眷存。首貽音諭。伏審坐籌大計。翕萃繁禧。恭以某官行潔道醇。才宏業鉅。外臺劇使。頻成第課之優。東觀昔游。已復載言之選。蓋上心之圖舊。行恩數之疇庸。領漕節之輸將。諒非久次。踐王塗之嚴密。進服徽章。

代答曹州孫祠部書

官部按疆日傾盛德。客車假道時剽美聲。思清晤以未遑。遺珍題之首及。仰銜嘉貺。第繫鄙衷。恭以某官。方格淳修。才猷膚敏。紫垣列宿。蚤踐於清郎。綠野班春。聊蘇於雅俗。行圖風績。增晉褒章。

代賀亳州皇甫諫議書

伏審光膺細札。移甸巨邦。審即便辰。已開尊府。伏惟慶慰。恭以某官。行推高爽。道具粹醇。親逢宸辰之知。蚤陟諫垣之祕。洊凝風績。頻易守麾。唯亳社之名區。實淮壖之重鎮。暫繫耆德。以布寬條。熊軾班春。豈容於秩滿。鳳書申命。行被於詔還。

代問候文相公移鎮書

伏審卓馬還朝。朱轡赴鎮。已離邦於日下。將假道於淮邊。鏡鼓沸川。特雄方面之勢。冠蓋溢路。願識相君之威。矧叨簪紱之聯。嘗託鈞衡之造。日傾台旆。增企懸襟。伏惟順履。蕭辰。誕迎茨福。恭惟某官。民靈先覺。王佐偉才。感會帝宸。綢繆公路。畫一之歌。既作。休有成規。太平之策略。行。遽臻至治。暢衰謀於已試。收廟略而弗居。出甸陪京。靡遑滿歲。旋膺徽冊。易鎮要藩。行將宣布寬條。撫柔雅俗。坐席未煖。亟五月之政成。詔書誕頒。復三篇之冊拜。俛惟疏冗。訖望埏陶。

代回舒州柳龍圖書

比塵使局。獲邇侯封。徒然燕語之傾。缺爾賡修之奉。豈圖高誼。首占珍題。情在遠而逾親。禮由謙而益厚。兼審坐班寬詔。舉萃繁禱。恭以某官。才貫幾深。器函剛實。對休辰而逢吉。揚顯仕以垂光。冠卿列於禮司。

登禁聯於延閣。圭符假守。聊鎮於善藩。鈞軸須賢。行祇於迅召。

代上并州梁相公書

伏念自領小麾。久從遐徼。門牆萬里。敢忘塊北之仁。寒燠二音。不徹崇高之聽。台光在望。愚悃增勞。寒籥丁辰。善藩觀政。神明所相。福祚其蕃。恭以某官。社稷元臣。山河間氣。樞廷宥密。早暢於廟謨。宰席凝嚴。深裨於國體。前班漢詔。出殿并門。屈大丞相之威尊。總外諸侯之節制。兒童迎迓。競喜細侯之來。姦黨散逃。率歸廣漠之治。行圖偉蹟。還宅上台。

代上許州賈侍中書

爰初還臺。以迄補郡。台光在望。曾無數舍之遙。俗狀增勞。都缺單函之獻。第負芒而引媿。難擢髮以論愆。竊繫上宰之量。洪未識下僚之禮。廢伏惟坐班。藩政參嚮天和。恭以某官。業履崇高。智謀廣大。抱誠明之正性。秉忠諒之一心。早簡帝衷。首謀王體。師尹當國。有具瞻之民。阿衡代天。無不被之德。以至疇咨舊德。登冠鴻樞。珍策立成。遠人坐至。帷幄以肅。京師其尊。位長百工。允極宗臣之貴。柄更二府。弗收造物之功。懇列壤封。請臨寰服。對宸緡之均逸。露公冕以觀風。居外弗異于中。斂大以施于小。行膺徽冊。復圖文武之才。還秉元鈞。寔造邦家之福。

代都運張待制與宣撫郭樞密遠迎書

伏審出佈恩德。近違威顏。前纛甫臨。列城增企。冒霜稜之初凜。萃時社以載蕃。恭惟某官。偉略沉雄。傑才

高邁。胃襲汾陽之慶。神傳圯上之符。方倚壯猷。以籌多算。會小戎之玩境。煩近弼以臨邊。制勝幄中。未煖鴻樞之席。宣威闔外。遽揚都統之旗。行懋丕功。坐寬西顧。某漕文所繫。郊候無期。欣跂并深。名云非悉。

代王龍圖問候省主韓侍郎書

自去朝游。遂叨州守。當兵民之綏御。亦既踰年。凡使客之往來。曾無虛日。居有寬條之所布。間爲多病之相乘。雖勤向德誼之心。不忘朝夕。而仰諮福履之禮。曠敝寒暄。方涉冬嚴。諒蕃時社。伏惟某官。才包王佐。道貫民彝。名躋日月之高。學破神鬼之奧。瞻中都之調度。坐懋豐功。揭海宇之儀型。行膺教册。

與郭樞密遠迎書

比貢音函。當徹高明之視。適丁寒籥。仰惟跋履之勤。兼審嚴驕。甫臨近境。行瞻台範。增企鄙懷。伏惟某官。鉅業茂明。傑才宏遠。本兵之地。輟帷幄之前籌。奉詔以行。寬朝廷之西顧。餘留迎謁。併敘欣翹。

代張待制與宣撫郭樞密遠迎書

伏審前旌。甫臨近境。卽躬郊候。增聽車音。仰遐冒于霜稜。固載蕃于時社。伏惟某官。偉謨經世。丕績熙朝。制勝中樞。聊輟神機之助。宣威西徼。行聞廟算之平。進謁有階。翹瞻尤劇。

答鳳翔黃元禮察推書

向緣厚幸。得奉賢規。曾乏少閒。遂疎主禮。睽違未幾。瞻嚮殊深。遽損音題。過存愛意。屬霜稜之倍厲。固時社之載蕃。伏惟察推廷評。方格淳修。才猷膚敏。寧久煩於婉畫。行前對於華恩。頂字自寺。刻良片壽。

賀滄守沈修撰書

伏審就鎮劇藩兼榮祕殿肇開尊府肅布寬條伏惟慶慰恭以某官厚望端朝傑才高世包經謀于術內富羣籍于胸中瞻給京師方轉漕臺之粟慰安黎庶旋分師闡之符重通儒之操修當太史之論撰行祗嚴詔寢服皇僚

賀王周二侍講書

伏審內閣升華禁筵勸講側聞成命竊忭丹悰伏惟某官名世挺才際天蘊識不由汲引自逢真主之知旋取顯榮漸見通儒之效比進升于書殿亟入侍于經帷上方嚮文適資稽古之力行矣登用遂適當今之宜列慶稍稽負慙良劇

與慶州機宜曾節推書

自關高風倏經累月比辱音函之貺殊欽禮意之勤旋苦舊疴稽修報牘方講邊防之節制諒煩幕府之文書益保粹襟行膺茂渥

回提刑少卿書

比者建旄舊雍總節全秦運帷幄之前籌曷明遠略寬朝廷之西顧第竭寸心方休道路之勤卽有詔條之奉未遑敘悃先辱占書感愧并深名言非悉

回慶州王給事渭州蔡待制書

誤蒙上旨。出總西師。初見吏民。甫班條教。久荷謀謨之責。寢篤精力之疲。尙繫邊閩之帥才。協圖大事。庶副朝廷之聖寄。共底成功。曾書禮之未修。遽慶音之首及。并深感愧。奚盡名云。

回河中府呂修撰書

比辭冢任。旋付劇權。剖分陝之守符。總全秦之帥節。下車視事。方祇布于詔條。記室占書。遽遠形于禮意。永言感篆。奚盡名云。

賀判府宣徽太尉書

恭惟判府宣徽太尉。大忠奕世。偉業熙朝。參制五兵。輟樞廷之勝算。并護諸將。領邊閩之劇權。進揚徽猷。增峻台序。疆場無事。行底于丕功。旂常有銘。愈光于前烈。某心馳門下。跡繫幕中。第修慶牘之虔。茲阻壽杯之獻。

回賀耀州冀郎中書

伏審比諏穀旦。肇布寬條。伏惟慶慰。本朝愛民。數郡擇守。維華原之重地。實陝服之劇州。氓編旣繁。訟牒亦衆。其當師帥之選。宜屬公明之材。恭以知郡郎中。識際幾深。器函端實。自底時名之重。游揚風績之優。剖符此方。寧需于滿歲。趨召不次。祇在于匪朝。曾慶禮之未修。遽誨音之首及。永言感忭。曷盡文陳。

賀渭州蔡待制書

恭惟知府經略待制。偉才經世。厚望端朝。出觀邊閩之風。進列禁塗之籍。通宣遠略。益懋壯猷。坐布藩條。

兼兵民之緩御。行參國論。陪承弼之謀謨。茂對令辰。載蕃景福。某心馳門下。跡繫幕中。徒度慶牘之修。茲阻壽杯之獻。

祠部集卷三十一

書

賀昭文相公書

竊審圖任眞賢。進升上宰。埏鉛所及。慶慰維鈞。伏惟某官。函德淳深。秉彝惇大。豐元猷于台路。懋偉績于王家。萬化經懷。多識廟堂之故事。羣生順理。久躋區宇于大安。素望日充。清衷愈簡。首寧天緯。就專尹氏之秉鈞。永翊帝圖。當邁汾陽之書考。格太平之極致。殫康濟之初心。成命旣行。私誠竊忭。

賀集賢相公書

竊審顯膺徽冊。對掌洪鈞。廊廟登賢。寰區均慶。伏惟某官。器函剛實。識貫幾深。才猷兼濟于百爲。智略可酬于萬變。制兵樞幄。方運留侯之籌。論道宰庭。遽隨蕭相之畫。矧云賢業。夙簡睿心。君臣一德之所同。古無與擬。禮樂百年而後作。今也其時。行鬯偉謨。亟躋極治。側聞新命。增忭丹悰。

賀富相公判西京書

竊審屢抗囊封。懇辭宰柄。輟中階之諭道。委近輔以優賢。素志獨諧。清風逾遠。伏惟某官。誠明正性。忠亮一心。久于社稷之宣勞。數以翰垣而均佚。復歸家席。比符周尹之具瞻。曾未朞年。連謝留侯之多病。上方急治。倚以鬯謀。諒緣誠請之堅。遂許老成之去。鎮安雅俗。暫茲爲福于一方。寤寐宗工。更覬蒙休于四海。

仰高第劇展慶無從。

問候劉待制書

近者使旆之東。客亭云別。冒風霜之初勁。歷道路以載勤。俯稅征車。諒完泰宇。睽違未久。企仰尤深。宅兆奉安。良增于永慕。朝廷倚任。倍冀于自持。瞻禱并懷。名言非諭。

回提舉郎中書

竊審專倚周才。共經外計。就膺邦選。出按邊儲。伏惟某官。學造聖源。識通治體。已試財闡之效。屈從守紱之行。清議未安。休聲愈劭。賢業可兼于數器。惟所設施。兵須肯責于一端。別當簡擢。冒霜稜之初厲。擁時祉以載蕃。敍慶尙稽。占書云及。其爲感忭。奚究名言。

回韓內翰書

審膺恩綍。登踐禁扃。內相得人。衆賢胥賀。某官性恬榮利。學造淵源。勳羽翼于東朝。旋表儀于近侍。進以直玉堂之祕。足罄忠規。繇此調金鼎之和。始符公議。聊藉演綸之大手。卽據澤物之初心。未列慶函。首紆榮牘。永言感忭。曷盡名云。

回邢州狄閣使書

審卽便時。已班寬詔。宿官茲限。馳慶無從。伏惟某官。偉略沈雄。傑才膚敏。蚤膺世選。寢服使名。壯歲專城。更邁昔賢之盛事。元功仗節。行追先烈之英風。卽聽召還。靡需報政。首紆誨牘。仰佩謙懷。

回衢州周郎中書

審卽便時。肇班新治。未逾期月。已浹歡謠。伏惟某官。望厚周行。才兼數器。十年禁局。備紆風力之強。千里輔藩。聊布政條之裕。行膺迅召。函陟要塗。未列慶函。首紆誨牘。永言感忭。奚罄悃悃。謹奉書陳賀兼謝。

回提舉承旨端明王侍郎修實錄畢轉官書

竊審國史終篇。春官進秩。真儒之效。多士所榮。恭以某官。序冠禁塗。職尊祕殿。早以文章之大手。簡于神聖之淵衷。會仁廟之一朝。載信書于百世。編年幾易。實資才識之長。奏御甫成。訖被龍光之懋。稽修慶問。首枉珍函。感忭并深。名言非悉。

回昭文相公賀冬書

天陽云復。已慶問之先馳。台座且遙。猶鄙誠之未徹。敢謂自存謙矩。垂貺音函。荷禮意之過隆。寫感悃而增劇。伏惟某官。山河間氣。社稷宗工。代天工而調化。茲鬯辰猷。對日景之履長。茂膺純祉。載深慶忭。曷罄敷云。

回南京王宣徽書

自關風微。忽驚歲晏。雖政事已修之前跡。無所更爲。而音題或至于歷時。闕然不講。敢圖雅眷。特枉珍函。兼審偃息別都。撫柔嫩俗。神明所右。福祚其蕃。伏惟某官。勳濟王塗。望尊台路。政成五月。猶司留鑰之嚴。冊拜三篇。行秉宰鈞之要。益綏寢餼。少慰瞻祈。

回成都府陸龍圖書

審卽便時。肇班寬詔。治行千里。歡浹兩川。某官風績宏長。器資剛實。歷紆賢業。獨簡睿心。識延閣之河圖。殿會藩于井絡。撫柔遠俗。行聞最狀之成。延拜近司。靡候更書之滿。尙稽脩慶。首辱占音。感懌并懷。文陳非諭。

回昭文相公書

元朔更新。嘗首馳于慶問。上台存舊。乃交貺于音函。仰謙矩之過隆。寫感懷而增劇。伏惟某官。道光宰路。勳濟王塗。極治是經。元猷益壯。首運化鈞之妙。寅代天王。遙臨歲歷之端。亶膺時祉。

回趙參政書

泰通云始。嘗先布于慶音。謙德所存。亦交垂于榮問。載欽禮意。增戢感綜。伏惟某官。道具大醇。氣函間傑。參斷萬幾之化。措世旣安。遙臨三朔之辰。對時協吉。

回侍講呂惠卿學士書

審拜異恩。兼升美職。經帷勸講。書殿校文。陳睿選于一時。壯儒林之偉觀。某官傑才高爽。明智該宏。潛心自得于聖微。操術動居于物表。雖文章己任。已博極于羣書。而事業躬行。當亟躋于顯用。長牋垂貺。丹慊增銘。

回樞密侍郎書

久總帥符實託鴻樞之庇。第瞻台坐。良疎尺牘之音。首枉誨函。自存謙矩。兼審坐籌勝算。舉集蕃禱。伏惟某官。才貫幾深。德含簡厚。蚤重端朝之望。向煩陪幄之謀。兵本已摻。底方隅于無事。帝心所注。佇廊廟之有聲。益護燕興。少符企頌。

回陝西運使陳學士書

審對宸緡。出持使節。矧惟茂器。蚤履清塗。弗專事于空言。欲兼施于行事。虛承明之直舍。果被僉言。領全陝之計文。暫圖碩畫。勢非久次。歸置近班。遠枉書音。增銘感臆。

回彭城知縣太博書

審對明恩。亟遷美秩。未脩慶問。先枉誨音。伏惟某官。雅量淳夷。傑才庸敏。庇身大邑。尙屈高賢之資。掌故曲臺。有開榮路之漸。永言感頌。奚盡名言。

問候亳州判府富相公書

頃聯政柄。實依盛德之末光。今闕台符。尤切下情之勤嚮。貢音不數。負愧兼深。比惟偃息善藩。綏將泰宇。伏以某官。行參古烈。道冠時宗。挺然金石之純誠。休有鼎鐘之偉績。脫宰鈞而弗顧。自養崇高。心王室以無忘。孰爲內外。矧屬寧朝之急治。行從元老以諮謀。伏望益調燕興。仰副眷倚。

回越州通判曾學士書

居留少暇。衰病相仍。缺馳書舍之音。增企儒林之範。遠紆榮問。備戢高情。矧術業之表時。號文章之貫古。

優游法從。潤色辰猷。茲茂器之所宜。非別車之可屈。行祗嚴召。倍冀珍頤。

回賀參政韓侍郎書

伏審輟貳神樞。就聞幾政羣言。久穆竊忭。惟均伏惟某官。函德淳深。秉彝惇大。才兼文武之術。識照安危之機。本五兵以鎮四方。比參陪幄之制勝。財百工而調萬化。旋贊宰鈞之鬯謀。世選有光。睿心所賴。曾慶函之未列。遽榮問之先臨。欣感并懷。名言非諭。

回荆南知府元龍圖侍郎書

向圖綏御。兼撫列城之師。寢闕晤言。永懷延閣之老。過形盛意。遠貺珍函。矧惟聳望端朝。垂光近侍。藩條坐布。議者謂先于一州。國論入聞。行矣當抵于二府。益調燕餼。少副傾祈。

賀呂副樞書

寵膺明制。進貳鴻樞。矧辱已知。倍深距躍。恭以某官。誠明正性。忠亮一心。早被華纓。旋升顯服。久懋猷爲之盛。游揚事任之煩。撫全蜀之提封。通綏遠俗。司大農之經費。方瞻中都。會宥省之虛員。擢傑才而登選。物論惟允。神機所參。矧玉璜之慶宗。有金鉉之舊物。坐籌勝算。佇光賢業之施行。副具瞻以踵相門之烈。

又

伏審顯承明制。升貳鴻樞。伏惟慶慰。恭以某官。天資偉謨。世濟盛德。蚤進更于臚仕。旋登踐于皇僚。歷宣外榮。休有茂績。比領大農之計。獨當真主之知。會帷幄之虛員。慎樞機之制勝。方權綱總擘之際。親覈臣

鄰正賢傑彙征之期。擢參宥密。曾是相門之傑。矧爲國器之華。佇聞英袞之元猷。以紹青氈之舊烈。永言企忭。奚盡指名。

代回王尙書書

審卽便時。已班寬詔。方依鄰庇。增忭襟襟。伏惟某官。世濟忠勤。天資英果。蚤陟廉車之貴。旋增將鉞之雄。奕葉重侯。茂華宗于隴右。擁麾方伯。襲勝氣于山西。眷銅雀之故邦。付玉麟之新命。肇開尊府。並建高牙。緩帶輕裘。茲適偃藩之樂。昔繻今袴。行騰載路之謠。佇報政成。復光冊拜。

答便糶旬都官書

伏審大計倚才。朔陞按糶。適聞新命。頗愜丹襟。備形禮意之勤。首枉書辭之貺。矧郎垣之間傑。行被選求。豈兵食之常須。可煩施設。

答瀛州吳待制重九書

素籥貫辰。黃華應節。阻奉登高之樂。邊貽修慶之音。恭以某官。親會聖期。早躋法從。邊關倚重。暫煩綏御之才。國典疇庸。行罄弼謨之蘊。

代元給事回知兗州鞠學士書

總漕符之煩使。寸慮日勞。企書殿之清流。尺絨坐曠。敢期謙矩。首貺音函。審素籥之貫辰。保粹襟而迪吉。伏惟某官。器函剛實。識際幾深。久輟紬書之才。累彰行事之效。守麾易地。殿鄒魯之巨藩。民頌載塗。蹈襲

黃之遐躅。行祇迅召。歸映近班。

回河陰提舉贊運王比部書

久去近班。再司北漕。唯是輸將之冗。缺然音問之修。首枉書辭。良欽禮意。伏惟某官。郎垣碩彥。王國偉才。督舟運之萬艘。方圖碩畫。助邦須於一道。行奏膚功。霜氣比嚴。天和參嚮。

回新知邢州成少卿書

伏審顯奉宸緡。榮紆守紱。前旌在道。俯邇于治。封兼幅貽音。過形于禮意。良勤冒涉。益固福綏。恭惟某官。當世傑才。爲時儁老。繇風力之強濟。增治功之懋明。九寺名卿。寔登于貴重。萬家媿俗。行賴于撫柔。

回永興司馬端明書

審擇剛辰。已開尊府。兼百城之師帥。撫一道之兵民。恭以某官。名世真儒。禁塗頌德。不患寵榮之苟失。一以愛君。自全忠誼之所存。挺然許國。眷咸秦之輿壤。邇號略之故鄉。方茲垂組。以班春。更過懷章之歸日。封部安薦饑之俗。聊布上恩。朝廷思直道之言。卽還大用。首紆誨牘。增戢感悚。

回濱州張郎中書

肅卽剛辰。肇臨雅俗。環封千里。歡頌一辭。伏惟某官。風績宏長。才猷膚敏。奉行條教。暫專瀕海之城。趨走召音。行覲中天之闕。未修慶問。先枉誨函。感忭并深。名言奚悉。謹奉書陳賀兼謝。

回青州趙資政書

移殿鉅邦。肇開尊府。提封所暨。歡頌維均。伏惟某官。經世元猷。際天傑識。孝悌甚高之美行。早取重于朝廷。忠純不倚之亮誠。比同寅於廊廟。適遂偃藩之樂。未容坐席之安。亟被宸緡。旋更帥節。東海賜履。聊藉百城之表儀。南山具瞻。行副萬寓之傾屬。尙稽慶問。首枉誨音。感喜并懷。名言非諭。

回鄧州韓相公書

暫輟政鈞。適臨治屏。詔條云布。福祚其蕃。伏惟某官。勳濟王塗。道包民極。稟山河之間氣。挺金石之純誠。參斷萬幾。蚤仰追于先烈。協恭一德。旋昭冠于中階。方注意以綏邊。實鞠躬以扞患。未殫遠業。俄屈更藩。小醜尙存。實夙宵之所憤。大忠自信。奚出處之能移。一方雖被于仁風。四海奈思于霖雨。淑旂啓路。聊煩觀政之行。英袞熙朝。卽復調元之舊。羣心所企。衆論維均。暑氣尙煩。台光正阻。伏望上爲邦社。精調寢興。再任謝史館諸公及樞密侍郎書

向沐朝恩。初還鄉守。適更清漳之臥理。遽以全魏之居留。事物之來。實兼他郡之數倍。精神欲耗。勉及流年之再周。抗章願息于衰疲。易地少圖于閒曠。乃推異數。殊失初心。西雍節旄。幸獲辭于新命。北門管籥。猶仍撫于舊封。愚分粗安。厚恩有自。此蓋某官力陳宰論。密啓睿衷。誤寵不居。俾自全于所守。殘軀可退。未卽置于無庸。重寄復當。餘生奚補。

賀曾侍中判永興軍書

竊審進被明緡。往開尊府。抗使旌而就道。露公冕以觀風。成命旣行。羣言胥穆。伏惟某官。鈞衡舊德。金石

純誠才兼文武之資。身繫安危之託。留範廊廟。書功旂常。閒館優游。方養崇高之福。屬城節制。遙圖綏御之經。撫鶉首之巨封。賴貂冠之元老。雖曰長城之所倚。豈容坐席之少安。列郡後迎。行見晉公之再入。中階登冠。復歸周尹之具瞻。慶忭尤深。名言非悉。

回謝曾侍中賀加恩再任書

某稟生多病。假守再葺。庶少息于殘軀。遂懇求于閒郡。乃蒙過寵。殊戾本心。亟更帥節之新。不易留符之舊。上恩誠篤。愚分未安。數拜封章。始許追還于優渥。再司管鑰。訖令強策于衰疲。敢圖衰路之並游。首枉鈞函而垂慶。辱賁飾之相假。識謙懷之所存。待命累旬。報書差晚。載惟弱植。常懼疾顛。全退處于無庸。得自全于所守。睿心誤獎。猶未棄于餘生。幸論借優。俾尙叨于重寄。誓殫緜力。少答厚知。

代上楚兵部書

就膺嚴詔。趣覲清光。屬部百城。舉懷戀結。學宮一介。尤失據依。旋審簡圖。碩畫之長。登貳大農之劇。涓辰視事。順序養和。恭惟某官。望重本朝。才兼數器。游揚中外之選。並懋事功之成。造膝危言。曾無議論之阿。世致身要路。獨有猷爲之濟。時比更西道之使符。尋調北方之兵食。甫安坐席。俄被溫書。筵財省之浩煩。諒非久次。置禁塗之清切。行副輿言。俛惟材器之疎。晚陟門闈之峻。一見許與。固已殊于衆人。首垂薦論。益難酬于厚德。唯祈大用。訖託孤蹤。伏望上爲廟朝。精調寢饋。

涓辰其吉布治云初千里環封一辭均慶伏惟某官才兼文武學造聖賢蘇甲科以踐郎垣遽投定遠之筆適丁時而提將鉞佇拜淮陰之壇願是一麾決非久次慶函未列榮誨首貽感佩并懷文陳奚諫

回諸新恩學士書

竊審落筆禁局。袖書藏室。英廟盛崇文之選。詔近弼以舉知。聖朝謹先志之承。從新書而試可。某官學術該洽。材猷懋明。隨問納忠。策條當世之所急。按題析理。論發諸儒之未明。固非一日之空言。要在異時之行事。飛步儒館。垂光士林。首覲長牋。過形盛意。永言感懌。奚盡指云。

回瀛州安撫龍圖書

留都假守。曾密接于風聲。記室占書。辱過形於禮意。矧惟厚望。獨映近班。要劇洊揚。猷爲益懋。領帥符于一道。兼撫兵民。對宸詔之十行。佇陪丞弼。炎威方熾。時社載蕃。企頌感銘。并深悃臆。

回渭州經略待制諫議書

一睨賢範。俄洊歷于炎涼。各領帥符。遂相望于西北。首貽尺牘。增戢寸襟。矧德問之推高。賴威聲而經遠。關外之制。已坐懾于戎心。廷中之謨。行入裨于王體。益綏燕起。少副傾祈。

回北京通判高駕部書

顯奉細書。榮升別乘。側聞成命。竊忭丹衷。伏惟通判駕部。經世偉才。端朝碩望。關決名都之治。豈盡設施。延登要路之華。乃云宜稱。載惟厚幸。將庇末光。首枉音函。備形謙槩。其爲感慰。奚究名云。

賀宮使司空侍中書

伏審累抗奏封。懇辭幾政。適增台序之峻。茂對恩章之隆。禮冊誕敷。朝紳胥忭。伏惟某官。格天偉業。宰物元功。秉心不回。應變無滯。君陳之謀。猷后德。歷更三朝。公旦之勤。勞王家。遠過一紀。忠至竭力。功成退身。何有鈞衡。遂還印綬。進班宏父之位。領使列真之居。灑然清風。惟高懷之甫適。仰止元老。恐靜退之難常。就慶莫追。馳情第切。

賀吳副樞書

竊審茂對上恩。榮膺右府。君子得行其道。衆人相賀于朝。伏惟某官。鉅業適時。傑才周物。蚤紆素蘊。寢服皇僚。主計大農。方底京師之瞻給。代言中禁。甫追典誥之坦明。更賴猷爲。旋升宥密。五兵之本。參運留侯之籌。萬化所調。行隨蕭相之畫。側聞顯命。增忭鄙懷。

回判銓記注陳述古學士書

謁告上前。暫開載言之筆。問安親側。適拜登慶之堂。遐冒霜稜。載蕃時社。首紆榮檢。備戢謙懷。矧近侍之凝嚴。加中銓之要劇。難遂晨昏之養。卽瞻咫尺之顏。益冀自持。行膺大任。

賀南京留守王宣徽生日書

良月輔周。凝乾坤之正氣。元精所萃。毓社稷之宗工。伏惟某官。業履崇高。智謀光大。留符居守。雖知出處之均。宰柄登庸。實稽中外之望。方冬云孟。生德維時。俾壽而臧。聊次詩人之頌。式宴且喜。阻持賀客之觴。

瞻禱并懷名言奚悉

回新運使楚兵部書

審膺邦選。就領漕符。維外臺鈞號于劇煩。而北道倍勞于運給。矧望著本朝之重。以才兼數器之周。需心計之有餘。暫繫碩畫。豫邊須于有備。行底丕功。首枉誨函。過形謙槩。愧慶音之未列。戢感臆以逾深。

回延州經略郭宣徽書

留符所守。已再見于歲陰。治屏且遙。第增思于台範。特紆榮牘。備戢謙懷。兼審靜制一方。翕臻百福。伏惟某官。智謀宏博。識度沈雄。蚤暢徽猷。久宣遠略。禦戎闔外。繫坐振于威聲。制勝幄中。卽進司于宥密。益綏燕起。少副瞻祈。

問候陝西宣撫韓參政書

宣導詔音。煩宗工之西撫。發施廟算。俾強敵之外攘。遐歷關河。良勤車馬。神明所祐。福祚載蕃。伏惟某官。經世元猷。際天傑識。方圖新于百度。會有警于一方。台席暫虛。往總裁于疆事。寇巢卽殄。還登進于冢司。伏冀上爲邦家。益綏寢餽。

回新鄆州邵資政書

守北門之留鑰。洊歷暄涼。企東里之治封。曠諮燕起。旋聞易鎮。仍缺馳書。荷厚德之隆謙。枉珍函而垂賁。審丁寒籥。增迪粹襟。伏惟某官。才貫幾深。器函簡厚。勳貳樞廷之密祕。屢更督府之雄威。兼撫兵民。未暇

溪堂之式宴。復參丞弼。卽符海寓之具瞻。伏望上爲邦家。益調寢饋。

回郭宣徽書

竊審視公袞之絕班。就膺異數。仍帥符之重寄。坐鎮雄藩。伏惟某官。經遠偉謀。濟時明略。寬朝廷之西顧。輟帷幄之前籌。疆事久勞。緊外平于戎索。詔音垂及。行人總于神機。旋錄膚功。亟加顯命。未繇修慶。首辱占書。感愧并懷。名言非論。

回判大理寺崔司勳書

復來北道。介立羣居。拙直無機。都與時情之異嚮。據依有地。獨蒙賢者之重知。旋闊高風。遙經累月。敘戀未伸于尺紙。馳誠常結于寸襟。敢謂隆謙。猥先賜教。復此臥疴之有日。職茲修報之不時。尙繫恩憐。特以情恕。伏惟某官。才兼數器。望厚本朝。陰德固多。曷涯于顯用。睿心所簡。益懋于華章。順履春陽。載蕃時祉。更新珍重。少副瞻依。

代魏公回曾子宣學士書

竊審發蘊治朝。垂光書殿。家聲繼美。士論稱榮。伏惟某官。偉業濟時。醇文貫道。疾陋儒之無補。唯事空言。會真主之有爲。自圖實效。讎譌文于簡冊。講長利于家邦。兼屬周才。良階顯用。未諧修慶。首辱占書。愧忭并懷。名言非論。

回賢良呂屯田書

審策危言。旋躋異等。士林聳勸。賢業增光。伏惟某官。方格淳修。器資夷遠。智周事物之變。學際天人之交。落筆大庭。悉指時而無隱。奏篇中扆。皆措世于可行。豈緊褒陟之恩。能稱詳延之實。卽聞顯用。少副輿言。首貺長牋。深銘丹臆。

回越州通判曾學士書

二氣交泰。百家寢亨。茂對歲端。竄應時祉。恭以某官。學探聖際。文醇古初。頡頏嚴塗。久積士林之望。徘徊別乘。尙深賢器之藏。年籥更新。召函垂至。首紆慶問。倍戢感悰。

代魏公問候集賢相公書

向司留籥。獲庇宰鈞。比緣輔弼之勞神。遂至寒暄之違俗。慮煩省覽。曠牋牘之問安。旋稔善平。與邦家而均慶。伏惟某官。器函剛實。道貫幾深。昭安危之大方。更文武之二柄。謀謨廊廟。曾勿失於蕭規。利澤幅員。實具瞻於尹石。伏望倍綏燕饒。仰副倚毗。

回呂舍人書

審對制函。榮升詞掖。矧惟鉅業。獨映本朝。凜然臺中之風。休有天下之望。籠財北道。頗違澤物之初心。落筆西垣。遽屬演綸之大手。追坦明於三代。掩深厚於二京。聊鬯壯猷。可量顯用。永言慶忭。奚盡文陳。

回林學士書

審對恩函。旋登書殿。矧大猷之高世。繇遠業之傳家。是正譌文。甫訖羽陵之蠹簡。校讎祕館。茲云王氏之

青氈物論所榮。霄程可測。特存高誼。垂貺長牋。喜切感銘。兼深鄙抱。

回賀省主吳內翰書

審膺制檢。就陟禁局。曾未列於慶函。遽首貽于珍牘。矧以傑才高世。厚望端朝。嚮儒學之淵源。稱辰猷之潤色。元昆舊物。繼書綸綍之溫辭。多士美談。曾耀衣冠之盛事。况大農之要地。實近輔之便塗。行服茂恩。進聞幾政。

賀賈魏公還節罷侍中仍舊左僕射加大觀文書

伏審懇列封章。勦還節鉞。愈恩易地。徽册告廷。進升祕殿之華。臨長中臺之劇。伏惟慶慰。恭以某官。樞衡舊德。金石純誠。才兼文武之資。身繫安危之託。留範廊廟。書功旂常。比均北道之久勞。得請陪京之舊治。抗雙旌而入覲。方倚老成。辭六纛之啓行。邊形露奏。自養崇高之福。益敦恬尚之風。左相絕班。仍表儀於列辟。文昌要地。便咨訪于元猷。企忭并深。敷論非悉。

賀陳副樞書

入奉恩綬。進升倍幄。伏惟慶慰。恭以某官。才包王佐。勳濟聖時。蚤歷華塗。旋躋顯服。比讓鴻樞之亞。出宣遠略之勤。二敵以寧。嚮威聲于邊闡。五兵所制。著雅望于本朝。遽趣介圭之還。復參宥省之舊。行膺册拜。乃副輿瞻。

與機宜安厚卿著作書

就被辟書。屈從幕府。兵民一道。聊煩樽俎之謀。賓主相歡。應適詩書之願。矧收名於異等。卽飛步於嚴塗。得庇末光。尤深竊忭。

代元給事答成都府趙龍圖書

龍財北道。轉粟中都。顧無煩使之長。賴在高賢之後。尙容竊幸。可踵成規。甫舍征車。未馳謝幅。懽然禮意之相厚。首以誨音而遠貽。審布寬條。靖綏遐服。神明所相。福祚其蕃。恭以某官。美行甚高。至誠自信。升諫垣以開忠亮之蘊。總漕節以見輸將之才。直內閣之圖書。帶西州之印綬。兵民兼制。政任實繁。坐鎮有餘。惠浹兩川之舊。召還可待。治幾五月之成。柄任云歸。輿言所協。

回并州唐龍圖書

解麾南服。總計北陲。方休道路之勤。卽董舟車之運。稽郵音而講好。煩記室之占書。仰戢謙懷。中藏感臆。恭以某官。誠明正性。忠亮一心。蚤被華纓。寔升顯服。擊邪扶正。自全國體之重。輕執憲班條。不計身謀之進退。適繫遠略。云殿劇藩。維薄伐之故區。實勁兵之要處。境控二敵。地綿百城。暫煩細侯。往護諸將。矧威聲之素著。加治迹之頻行。優奏膺功。入敷休命。

代魏公回曾舍人書

審對制函。進升禁掖。訓辭鼓天下之聽。詔命見聖人之心。維時代言。僉曰宜職。某官道結真主。學通先王。盛際親逢。於有爲。貴名自取。於不次。兼提數局。奄有羣才之所長。屢抗至言。力齊衆論之不一。聊屬演綸。

之手。未殫澤物之心。勢匪久居。議當大用。適叨封國之假守。側聽治朝之得賢。未列慶音。首紆榮誨。永言感愧。奚盡文陳。

上杭州知府沈諫議書

頃者。爲令屬封。託公餘庇。一以恩私之煦。曾何位貌之論。常獲坐隅之進趨。不知縣道之疎冗。幕府連從。於西北。門闌。阻於東南。積是朝夕。係仰之誠。缺然寒暄。起居之間。蓋術業不長於他政。唯管記見役於上官。欲爲一書。翻苦少暇。抑中年精力之有限。非盛德須臾之敢忘。尙斬高明。或貸罪戾。恭惟知府大諫。道德之老。朝野所宗。才究百爲之長。識通萬事之變。游揚中外。並建事功。時論愈歸。風績時懋。二浙會府。矧在歷居之已勞。七人近班。不應補外之宜久。行祇嚴詔。入輔寧朝。俛惟孤生。尤切勤禱。雖躬被善化。阻預鄉人之閒。而口頌壯猷。肯居國士之後。風霜正凜。旌榮方遙。上爲邦家。倍綏寢饋。

代魏公回宋次道諫議書

宮符久領。居常多病。而少閒。函訊每來。滋用負慙。而懷感。方歲律之逾盡。惟生經之粹安。某官才貫幾深。德含簡厚。蚤進升於法從。比臨長於諫工。博極羣書。多識朝廷之故事。參聞大政。行追家世之先芬。益護燕興。少符傾祝。

回新恩通判賀郎中書

竊審顯承宸恩。榮貳尹政。曾未單函之脩慶。遽先累幅之惠音。祇服謙懷。增銘感臆。伏惟通判郎中。秉彝

簡厚操術精深。淹回不歎於郎潛。恬約自高於物論。名都劇治。暫勞關決之才。要路華章。行懋延登之寵。春期將半。時祉載蕃。瞻頌感藏。不勝下懇。

回劉道叔祕校書

曾是晚生。獲親盛德。忘年相厚。契緣出於士科。聞道固先。禮止容於兄事。遠離幾月。倏忽中春。伏惟心游六經。躬享百祿。未暇一書之敘。戀遽煩累驛。以寄聲。方真主之急賢。矧宿儒之抱道。行聞延訪。起備諮詢。瞻頌感藏。并深下悃。

代魏公回發運羅少卿問候書

留符所守。使範且遙。敢圖雅愛之存。遽有珍題之貺。兼承近履。參嚮蕃禧。惟望重於本朝。矧才周於數器。久煩碩畫。總山海之輸將。屢懋丕功。瞻邦家之供億。行祇明詔。歸踐嚴塗。感頌并深。名言非悉。

與二府書

向勞重任。遂乞餘生。得守故鄉。甫安坐席。一奪清漳之臥治。再叨全魏之居留。矧惟北門。實控朔野。素號多事。罕常少休。匪勉三年。智與力而俱困。支離四體。疾乘衰而屢攻。苟復徘徊。則將顛隕。載念朝廷之極寵。莫如將相之兼榮。曾是罔功。久茲空食。慮役坐戕於神觀。量盈陰懼於鬼誅。所以洊露封章。仰干旒展。懇還旌節。願易麾符。愚衷雖堅。睿聽猶隔。自非四近之協助。曷使兩端之畢諧。顯勞合被於褒嘉。公累遂諧於滿滌。未容贊善。先辱惠音。行聞九寺之進承。續具一書而修慶。永言感怍。曷盡名云。

回磁州晁大卿書

不聞餘教。第驚日月之屢更。常跂下風。闕敝寒暄而上達。簡惰若是。擯遺乃宜。敢圖損卿老之達尊。眷郎曹之晚進。首貽勤誨。備戢謙懷。仍審順履。春和載蕃。時祉伏惟。知郡大卿。德函渾厚。識貫幾深。沛然風力之有餘。底厥事功之甚懋。清門濟美。矧追迹于先芬。嚴詔趣歸。行垂光于近著。

代魏公賀富相公致仕書

竊審顯册告廷。安車就第。兼榮將相。增快公卿。素志一時。清風萬世。伏惟某官。德尊台路。助在王朝。忠亮丹誠。屯夷共貫。頻年避位。鬯謀未及於道行。晚歲偃藩。知止漸圖于身退。遽舍皐夔之偉績。遂諧箕穎之初心。宏父進班。聖君優老。動清洛之喜色。追香山之舊游。某早庇末光。比聞成命。激懦衷而竊慕。愧勇退之云先。企忭并深。名言非悉。

代王龍圖賀郭宣撫書

伏審上注睿意。出宣詔音。惟時列城。咸企前纛。伏惟慶慰。恭以某官。傑才高世。偉略絕人。夔忠誼于世芬。洞機鈴於兵要。比自廉車之貴。亟躋宥府之嚴。方緊壯猷。曾未累月。會小戎之玩塞。資厚望以臨藩。絲密勿之廷中。往籌多算。專慰安於闔外。坐制一方。佇銘鐘鼎之勳。增重邦家之望。水行貫序。時祉叢休。

代王樂道龍圖回環慶副總管張團練書

伏審延獎膚功。就膺寵命。增使名之峻秩。貳帥路之劇權。未列慶函。首貽珍贖。往乘邊障。方倚於傑才。出

擁戎旛。卽光於美拜。永言忻感。實倍常彝。

上北京通判兩郎中書

嚮者。備員屬邑。託庇副車。官書期會之間。未嘗檢察。公事起居之際。爲霽威嚴。訖由恩臨。得以理去。逮從事于幕府。益馳戀於門牆。素篇兆涼。粹襟迪吉。恭惟通判郎中。才兼數器。名重本朝。貳尹治於別京。已登最狀。擴賢謨於要路。行懋休功。伏望上爲邦家。精調寢饋。

代與蘄州呂兵部和州傅戶部書

向此爲州。遂有米鹽之細務。居維企德。實疎竿牘之常儀。自履冬嚴。諒蕃時祉。伏惟某官。心惟忠誼。學有本原。危言朝忤於九天。清議夕傳於四海。要官美職。視如一羽之輕。大節高名。坐若泰山之重。暫分符於淮右。行趣召於朝端。左右嘉謨。旦夕顯用。伏望爲國自厚。副時所瞻。

代張待制回鄭學士書

伏審上方給筆。甫程試可之篇。麗正讎書。遽踐入優之等。騫翔茲始。欽卮逾深。惟儒館之盛游。實治朝之華選。豈特文章之諸彥。於爾爲羣。由來公相之貴人。此塗所出。某官學探聖闢。名重士林。鼓揆庭之雄辭。中入轂之上第。綠髮方壯。矧致身之自高。青雲在前。信舉足之可到。尙稽馳慶。首辱貽書。媿荷并懷。文陳非論。

代王龍圖賀王待制書

竊審就奉制函。總提使節。伏惟慶慰。恭以某官。用兼數器。望重本朝。才猷懋明。風力強濟。間引兩川之漕。旋貳大農之籌。贍給中都。翺翔內閣。遙圖藩寄。允稔朝言。剖北道之帥符。甫溫坐席。餽西方之兵食。遽趣行臺。佇頌畫之少施。卽膚功之茂建。續須大用。訖副輿言。

上二相公書

某遠略本疎。忝寄忽驚於彌歲。舊疴間作。貢書遂至於曠時。仰兼度之有容。顧下誠之自愧。伏惟謨明王體。翼戴帝圖。一德同寅。百祥胥祐。恭以某官。器包民極。道濟王塗。挾重計以尊本朝。履正德以儀庶位。稷契諸己。唐虞吾君。崇賢繼姦。興利革弊。講猷爲之未詔。舉教化於可行。廟堂之間。日修輔相之能事。鐘鼎之上。行紀太平之極功。聳動搢紳。光華典冊。凝嚴貫序。變理經懷。倍保崇高。仰符眷倚。

上郭樞密書

伏審樞廷虛位。陞城遠顛。出宣布于上恩。行節制於諸將。適臨寒籥。遐履征塗。陰有神明。來相福祚。恭惟某官。略包英遠。氣挺沈雄。襲祖烈於汾陽。授兵符於圜上。才不世出。名爲主知。方借前籌。參制幄中之勝。復資多算。聊爲塞外之行。諒敵寇之望風。懾威聲而遁跡。某適廣州守。佇展郊迎。欣企并深。文陳非悉。

賀王觀察仲儀書

竊審易祕殿之禁聯。就廉車之寵秩。仍更劇鎮。并服華恩。伏惟慶慰。恭以某官。經世壯猷。端朝雋老。揭聲光于白日。享富貴于青春。大公相之高門。早紆鉅業。撫兵民于西徼。方懋膚功。以文武之兼才。遽班聯之

易地解平涼之舊紱。換成德之新符。佇繇蕃闢之雄。歸秉鈞樞之重。永言欣頌。曷盡名云。

賀陳蔡二提刑書

伏審顯對恩函。就更使部。側聞成命。竊忤丹悰。伏惟某官。識際幾深。量函夷雅。擴長才于仕路。藹偉望于郎垣。奉詔中宸。體睿心之欽恤。按章列郡。多陰德之平反。行登踐于嚴塗。寢發舒于遠業。永言欣頌。曷盡文陳。

祠部集卷三十二

書

壽聖節人使三幅書

左番大使

誕聖膺期。方祝岡陵之壽。協鄰遣使。遙觀原隰之華。遐冒冬嚴。益蕃時祉。

左番副使

流虹紀節。會聖歷之開祥。乘驛相儀。亞使禮而修慶。載惟妙履。茂擁扈休。

右番大使

祥繞電樞。紀書王之首月。命虔星傳。赴誕聖之先期。載惟跋履之勤。益介綏將之祉。

右番副使

國壽開先。紀千齡之震夙。使才登貳。動六轡之輝華。順履隆寒。寶膺多福。

又

左番大使

比者。電樞紀瑞。行臨誕節之良。星傳增華。來奉慶儀之好。仰惟妙履。參萃繁禴。

左番副使

比者、國壽有開、鄰歡皆講、適屆流虹之節、遙勤飛驛之行、順履冬嚴、載蕃時祉、

右番大使

比者、華渚發祥、紀聖期之震夙、寶鄰講好、飭使傳以馳驅、遐冒隆寒、倍綏吉履、

右番副使

比者、誕聖膺期、睦鄰講好、參使輶而戾止、奉信節以勤斯、征轡甫休、粹襟滋豐、

同天節國信三幅書

左番大使

虹渚發祥、臨聖期之載誕、星輶講好、飭使傳以遐驅、適冒時暘、愈完氣宇、

左番副使

繞樞紀瑞、符誕聖之初辰、將幣相儀、奉協鄰之雅好、適臨近服、滋鬯粹襟、

右番大使

千秋紀節、適符祝嘏之期、四牡戒行、爰奉張檀之聘、載惟匪薄、諒協釐祥、

右番副使

乘詩首月、出震初辰、肅將信幣之來、參示使原之寵、載勤長道、聿集繁禱、

與賀同天節人使三幅書

左番大使

里社發祥舉馨岡陵之祝。輶車將命。適勤原隰之行。適冒時暘。諒安福履。

左番副使

國壽有開。符聖期之載夙。鄰歡胥講。持使節以偕來。將事云初。綏祺無爽。

右番大使

火行在候。符誕聖之初辰。星傳戒行。奉睦鄰之重好。征驂甫舍。秦宇惟寧。

右番副使

流虹紀節。會聖歷之開祥。乘驛戒行。亞使旌而相禮。適臨近服。滋鬯粹襟。

代邵興宗賀正旦人使三幅書

皇太后大使

某啓。伏以歲時云始。肆儀會於三朝。原隰其華。通懽恩於二國。載馳嚴馭。甫戾近圻。屬寒籥之貫辰。諒粹襟之迪吉。

皇太后副使

玉瑄肇和。方慶歲功之起。寶鄰修睦。乃勤使驛之來。多歷郵程。比臨畿次。神明所相。福祚其蕃。

皇帝大使

幹旋斗位。會王歲之開端。修講鄰權。寵使華而將命。冒風霜之餘凜。驅駢傳以少休。增固生經。茂迎時福。

皇帝副使

五始遙臨。百嘉滋鬯。爰講邦家之好。以均天地之休。禮意交伸。使才登選。征駢遐御。良多跋履之勞。寰服甫臨。益介綏將之祉。

排食

遐冒霜稜。肅馳星傳。已次神畿之近。竊循主道之常。敢羞庖餐。以勞車從。不賦之禮。有慙在顏。

攀違

奉幣成儀。啓塗復命。顧官居之有守。躬祖席以無階。少駐行暉。恂塵禮具。

代留守侍中契丹賀正旦人使三幅書

左番大使

玉瑄肇和。謹王春之此始。寶鄰修睦。嚴使節之斯來。星傳載驅。天祺參鬯。

左番副使

歲歷更端。春祺備合。協鄰講好。交修禮意之勤。將幣相儀。登貳使華之選。匝寒云冒。福祚其蕃。

右番大使

比者邦家相慶。甫王歲之闔端。原隰其華。緊使才而將命。載歷關河之邈。豈無車馬之勤。審次近圻。重應多福。

右番副使

天地發春。邦家均慶。榮命使旌之出。肅將信幣之來。矧寒籥之貫辰。諒粹襟之迪吉。

代王尙書契丹賀正旦人使三幅書

左番大使

蒼震發春。行講三朝之會。皇華將命。來通二國之歡。甫舍征驂。益綏泰宇。

左番副使

邁新正歲。開天地之大生。登貳使才。奉邦家之相慶。適臨寒籥。滋鬯粹襟。

右番大使

王春講始。仰新璿運之觀。使節講和。增固寶隣之好。隆寒云冒。純福其蕃。

右番副使

華歲闔端。具慶儀而有舊。寶鄰修睦。筵使節以斯來。六轡載馳。百祥備舍。

代滕元發北使三幅書

皇太后大使

某啓。伏以吹律宣和。方謹歲時之始。協鄰講好。恩同天地之休。爰寵使華。交伸禮意。載歷關河之逸。竊惟車騎之勞。願氣自持。與時迪吉。

皇太后副使

歲歷更端。春祺備合。惟使車之修睦。與鄰國以交權。星傳載驅。適持於信節。霜稜尙厲。益固於粹襟。

皇帝大使

蒼震發春。行講三朝之會。皇華將命。來通二國之權。冒霜序以勤斯。聽車音之戾止。仰惟妙履。參萃繁禧。

皇帝副使

王春謹始。遙新璿運之觀。使驛講和。益固寶鄰之契。適增華於原隰。行稱慶於軒墀。霜氣餘嚴。天和參鬱。

代馮內翰北朝賀登寶位人使三幅書

皇太后大使

炎運紹休。肇御天飛之極。皇華奉慶。遙虔星駕之行。甫次近畿。宣膺多福。

皇太后副使

伏審遠持信節。恭致慶函。驅星傳以少勤。冒火晏之餘熾。燕興並適。福祚其蕃。

皇帝大使

嗣聖膺圖。中天卽阼。邦家相慶。增修鄰好之深。原隰其華。遂曜使才之美。甫臻寰服。滋鬯粹襟。

皇帝副使

聖統纘寧。使旛修慶。載歷關河之邈。深惟車馬之勞。兼冒秋炎。諒綏時祉。

代魏公賀昭文相公書

伏審進膺顯冊。復秉洪鈞。廊廟登賢。寰區均慶。伏惟某官。山河間氣。社稷宗工。挾重計以翊本朝。履正德以儀庶位。措今師古。早摠珍策。於可行。尊主澤民。久嚮偉謨。於已試。向辭幾政之要。洊布教條之寬。顧西土之具瞻。遙歸師尹。煩東山之強起。實爲蒼生。行宣經濟之元猷。坐格太平之極致。某側聞成命。竊忭丹衷。

賀王參政書

竊審茂對制恩。參聞幾務。君子得行其道。衆賢相慶於朝。伏惟某官。函德淳深。秉彝惇大。體溫辭而書命。三代之風可還。對清問以傳經。一時之論無苟。天下之望蚤名。未仕之臯夔。廷中之謨。暫貳有聲之邴魏。側聞審簡。增忭鄙懷。

上相州傅待制書

比參戎幕。未逾匝月之期。再頒軍書。復應上臺之辟。審開尊府。道在別都。旣不能備一日之使令。得稱故吏於門下。又不獲釋累年之願望。略聞餘論於坐隅。退企末光。增深愚抱。伏惟某官。量包公輔。學際聖賢。廣譽令名。仰若泰山之重。危言珍策。措諸四海之安。蚤臨長於諫垣。旋出觀於治屏。上心圖治。矧聞獻納。

之前規。中詔趣歸。常鬯經綸之偉業。春詔過半。時社載蕃。願爲國家。精調寢饋。

代魏公回劉郎中書

比總帥符。益疏賢範。宣本朝之利澤。方究寸懷。枉順驛之飛文。過形厚意。矧惟鉅業。夙簡淵衷。佇馬政之有成。被龍光於不次。餘惟輔衛。少副願言。

回趙參政書

比領守符。兼提帥路。纔奉行於寬詔。卽論謝於單函。國論多餘。郵旨繼及。過形賁飾。增重常彝。惟參斷於萬幾。諒翕膺乎百福。伏惟某官。端朝碩望。經世元猷。天下表儀。仰淵騫之德行。廷中事業。贊邴魏之謀謨。益保粹襟。行膺徽冊。

回王宣徽書

比緣病質。丐領僻州。帥路別都。遽蒙于委寄。守符留鑰。遂忝于交承。賴善政之有條。容鄙才之循跡。尙期必告得盡所聞。

又

邁馳卓馬之朝。入赴蒼龍之闕。方懷盛德。稽布尺書。恐前墜于誨音。第中藏于感臆。伏惟某官。道包衆美。氣稟元精。出入三朝。備紓于賢業。東西二府。行慰于民瞻。伏望上爲邦家。益綏寢饋。

代馮內翰回廣州余尙書書

伏審被明詔之溫辭。陟中臺之貴秩。官儀益峻。物論僉榮。敢圖自損。達尊首貽寵教。仰服謙懷之厚。第藏感臆之深。恭惟某官。道德宗工。文章雋老。才周數器。名重本朝。危言早動于丹墀。偉蹟近光于銅柱。兼倚遠略。暫提南海之要封。若咨升庸。當簡曲江之舊德。伏望上爲邦社。精綏燕興。

代王內翰上賈梁二相書

某擢始孤生。躡躋近侍。與材散木。繫化匠之爲容。獲器寒金。繇宰鈞之所鑄。旋冒複門之華選。寢疏翹館之盛游。居企台儀。間勞禁職。會缺音函之獻。莫諮德宇之寧。伏惟靜鎮會都。樂班寬詔。神明所右。福祉其蕃。恭以某官。識交天人。誠貫日月。帶上公之印綬。擁方伯之旌旗。威行列城。令肅外闔。身任安危之重。遠俗猶聞。才通文武之兼。萬邦以憲。雖袞衣願封於東邑。欲留周公。而舟楫能濟於巨川。當用商相。行膺徽册。還秉元鈞。

上程宣徽書

阻拜台符。屢環歲歷。實首承於內命。且兼領於他司。間裁詔誥之餘。旋汨簿書之冗。單函不講。盛德焉依。竊恃誤知之深。尙寬苛禮之廢。伏惟坐觀藩政。翁受天祺。恭以某官。道具將明。體凝簡厚。抱廟堂之偉業。挺金石之純誠。貳政鈞樞。少見大臣之能事。班條屏翰。未收真相之極功。矧徽省之名區。卽宰塗之便道。節趨非晚。柄任其時。忭躍維深。文陳曷罄。

上王定州君貺張南京安道錢秦州子飛書

逃阻珍羣。屢遷華序。思綸言之對掌。深慕昔游。玷詔旨之首承。實虧時望。牽禁局之職業。事官府之文移。寸慮日勞。尺書坐曠。仰惟妙履。參嚮龐禰。恭以某官忠諒一心。誠明正性。高文典冊。以甲乎科等。危言至論。以根夫治經。潤色辰猷。蚤據不世之蘊。謨明王體。久具有生之瞻。旋析左符。遙臨巨屏。矧講求于新治。方諮納于嘉謀。靡須五月之政成。卽被三篇之冊拜。

上唐龍圖子方書

伏惟總臨大計。誕擁繁禧。恭以某官名世標才。際天蘊識。蚤紆賢業。自結主知。開正論于諫垣。峻榮班于延閣。時議加重。風聲有休。董北道之輸將。暫煩碩畫。瞻中都之供億。佇報膚功。行奉詔音。驟歸柄任。

與吳仲庶孫次公王至之張文裕書

久闊朝游。載瞻賢範。禁塗視草。適居侍從之勞。訟舍坐棠。諒樂中和之職。伏惟某官當世雋老。爲時聞人。猷謀可師。德業甚懋。總列城于一道。節制攸歸。嚴督府之萬兵。恩威並暢。行祇迅召。益衛粹襟。

與李西臺書

躋職禁局。久遠德宇。伏惟踐文昌之貴秩。樂素里之平居。益介康祺。彌餘逸韻。恭以某官得氣間傑。爲時老成。識達聖賢之歸。言該名理之要。柏臺留務。遂清尙以優游。李蹊慶宗。襲餘芬之止足。倍慎高年之養。行光大政之諮。

問候郝殿前書

總帥西來。百爲所繫。懷賢東望。千里而遙。馳誠則深。布問差緩。矧惟雄略。夙簡睿心。節旄蚤進于榮班。陛戟久提于禁旅。行膺徽冊。入贊鴻樞。益護燕興。庶符瞻頌。

回懷州傳待制書

承臨便郡。已布寬條。高誼迴存。珍函首及。矧惟厚望。早服近班。筆下極言。嘗論治亂之體。禁中勸講。久格聖人之聰。諒坐席之甫溫。卽銜車之趣召。

問候渭州蔡待制書

帥符所守。顧燕語之莫同。使驛之來。反函封之相繼。比惟福履。誕擁龐禰。緩帶輕裘。坐銷邊鄙之警。長轡遠御。益重朝廷之威。更冀珍頤。別膺寵數。

回新夔州路提刑李少卿書

竊審被命中宸。按章左蜀。首貽尺牘。增戢寸襟。矧厚望之端朝。加傑才之經世。躋榮卿寺。久懋於風聲。擢職使臺。行光於時論。

回呂省副書

審承召節。進貳財闈。解守紱以還朝。抗使旌而就道。嘉謨造膝。行入對於清光。賢業致身。期坐追於先烈。沐音函之敘別。企德範以馳誠。益護寢興。少符瞻頌。

回諸處知州寒食問候書

木行貫序。火禁丁辰。首枉書辭。備形禮意。矧惟治績。治著權謠。佳節遙臨。蕃禧參嚮。其爲感頌。曷盡名云。

回蘇省副書

向遇北轅。克襄大事。函封叙慰。醪醴致勤。茲粗變于常儀。辱繼形于榮誨。兼審載馳歸鞅。復涖財闈。順履春韶。益蕃時祉。行膺大用。倍冀精頤。

回楊四廂書

向承高誼。遠枉盛牋。論志意之欲爲。願言辭之甚壯。知是仁者之有勇。可使懦夫之聞風。間又相規。正如所願。其爲欽感。尤劇銘藏。

回郭宣徽禁煙問候書

木行貫序。火禁丁辰。首枉誨音。備形禮意。伏惟某官。位光台路。勳在王家。龍虎兵韜。自坐籌于方略。貔貅將士。皆遠服于威名。臨履春和。益蕃時祉。

代回王介甫內翰書

入相三朝。坐彌一紀。以有限之才。而應無窮之務。豈惟精力之已疲。以嘗試之身。而妨未用之賢。抑亦寵榮之太久。懇陳軒陛。得守鄉邦。功名弗居。惟慙往哲之趣。進退相得。偶合至賢之心。喜素節之獲全。枉盛辭而益美。適來總帥。遂緩布書。旋承違樂職之高懷。屬演綸之大手。前席論議。密簡聖人之衷。行追典誥之體。春暄未過。福履自持。

代回新知虢州田大卿書

比承高誼。特賜長牋。據經世之遠謀。條禦邊之上策。析文武爲二道。旣破拘儒之談。講兵戎之大機。有裨
陋識之見。不時布謝。惟日懷慚。春序過中。生經增裕。更加精畜。以對寵褒。

賀提刑雷左藏書

審承恩詔。出按刑章。矧風績之久凝。加時名之素著。首膺邦選。允穆朝言。佇聞庶獄之平反。庸副上心之
欽恤。下車視事。列郡瞻風。欣忭攸深。敷云非悉。

代問候趙參政韓副樞邵副樞書

遙來總帥。訖此踰時。乏文武之兼資。統兵民于諸道。內收已竭之慮。外役久勞之軀。殆無少閒。遂缺通問。
伏惟某官。德函惇大。才貫幾深。經世有爲。擴初心于康濟。致君以道。豐偉蹟于太平。行膺徽冊之光。以副
薦紳之屬。春韶云暮。時祉載蕃。益保燕興。少符瞻頌。

賀北京王宣徽書

竊審誕膺制冊。增峻台儀。成命旣行。羣言允穆。伏惟某官。器函惇大。道貫淳深。早更要路之遊。徧歷禁塗
之選。司別都之管鑰。再倚保釐。秉二府之鈞樞。久稽登用。聊褒崇夫偉業。緊宣鬯于徽猷。行拜命于三篇。
以圖寧于萬化。永言竹頌。曷究悃悃。

答賀慶陽李水部機宜書

竊審遠赴辟書。比臨戎幕。高材所處。大府之光。伏惟機宜水部。識度淳深。性資夷曠。屢違藩鎮之薦。自樂邱園之居。誼難退身。起爲知己。兵民胥賴。喜婉畫之必從。賓主相權。計成功之可底。行疇顯效。進服華章。忝頌并深。名言非悉。

回河陰提舉輦運杜比部書

伏審顯膺明命。榮領劇司。未列慶函。首貽誨牘。欣服謙矩。增銘感悚。伏惟提舉比部。風力素強。時才兼懋。董河防于一道。方賴底功。按舟運之萬艘。遑更重寄。行旌顯效。進服華章。欣頌并深。文陳非悉。

回賀吳舍人書

審被制函。進升詞掖。矧惟厚望。蚤映端朝。重潤色于辰猷。首延登于俊德。文章獨擅。榮司綸紱之言。伯仲相望。增盛衣冠之事。其爲欣慰。奚盡敷云。

代回相州謝祕監謝到任書

審即便時。已班寬詔。矧惟耆德。早懋風猷。望所舍之甘棠。阻觀新政。喜故鄉之喬木。亦被深仁。首墜誨音。增銘感臆。

代回絳州薛郎中謝到任書

竊審涓辰其吉。布治云初。曾慶問之未修。遽榮緘之首及。矧惟風力。卓建事功。卷百城澄按之才。就一郡撫柔之寄。寧久班于寬詔。當必復于要權。感頌并懷。名言非諭。

代回前知虢州李大卿謝得替書

辱紆累幅。承解左符。行路遮留。感惜仁侯之去。還朝進對。佇歎明主之休。矧治最之告成。卽恩章之增寵。勉加導衛。庸慰攀祈。

祠部集卷三十三

策問

試京兆府學生策問八道

問。讓者天下之美道。所以息伎心而長廉節也。處夫上者或爲之先。在下者陰從以效。今公卿大臣間。且受一命焉。暮必讓。讓至于三四不聽。則必就噫。果可讓也。奚三四而遂止。雖百十猶爲之。必聽焉而後已。其不可讓而讓也。是率天下以僞也。其從而效者皆僞道也。望伎心之息。廉節之長。難矣乎。今之讓可行耶。不可。

問。肉刑之刑慘也。後世憫其體膚之斷而去之。然罪有大于髡黥者。遂無等以處置。一加而至于死。於戲。斷者誠不可續。較死不猶近輕乎。若是變肉刑之慘。而反重之。豈法之得。就慘與重。奚適而可。

問。記曰。君子行禮。不求變俗。夫不求變俗。固也。俗固有媿惡。又可概而不之變乎。如是。則固簡者得藉以爲說。觀惡俗而恬不一變焉。將驅其俗以就吾禮。又慮夫安于故習。有不得已而就焉者。非中心樂而成變也。君子之于禮。如何爲可行。願以聞其說。

問。戰危事也。雖械變百出。或鮮克以濟。方長勺之役。曹劌問莊公何以戰。公曰。小大之獄。雖不能察。必以情。劌曰。可以一戰。噫。矢石旣接。敵者在望。驅生人而就死地。而曰我察獄能以情。可使之一戰必克乎。劌

之言。偶取于當時耶。遂可以爲後世用兵之術耶。問。昔者洪水氾濫。蛇龍交人之跡。禹導而行諸地中。然後九州以濬。而中國得以食。河自金隄之役興。其故道遷。而橫流肆者。後世不絕。今瀕河之地。或種不得下。有旣耕殆穫。而隨被水害者。無虛歲。欲順其性。而從其所自流。則有毀城壞畝之患。將堅其防以禦之。然水行地上。不決則溢。未見其可禦也。講河策者。必有長利。

問。孟子對齊宣王。以爲明堂者王者之堂。欲行王政。則勿毀噫。聖人之君世。其道德仁義。凡可以爲治者。莫不講。鰥寡孤獨。莫不皆有養。雖無是堂。王政可勿行乎。苟偃然自得于九重之上。弗講其所以獨治之具。而施仁弗先夫四者。又可以行王政乎。若是王政之行否。果繫一堂之存毀乎。否也。旣曰王者之堂矣。于齊焉得有諸。軻之旨安在。諸君試辨之。

問。書稱鯀陘洪水。汨陳其五行。帝乃震怒。弗畀洪範九疇。乃錫禹噫。天高乎在上。將觀其赫然震威以怒。鯀又諄諄然有所命以錫禹耶。不然。豈箕子之言過耶。抑禹得九疇。其取以治水者。果何法耶。及夫決天下之水而注之海。然後任九州之士。以定貢。彼八州者。先田後賦。莫不皆有貢。而冀獨反是。何耶。

問。夫子曰。吾四十而不惑。孟子曰。四十不動心。有以異乎。苟無以異也。是二者聖賢少時。何不能。必待四十而後可。孟子以爲顏淵具體而微。且淵也。短命。是未嘗至四十也。苟不至夫子之年。已不惑。則過聖人遠已。烏在其微也。若猶未也。旣未能無惑。其于聖人之道。有不足者矣。烏在其能具體也。諸君爲辨之。

試德州進士策問二道

問。儒苟名。則己必欲蹈其實。而不心乎治亂之原。未見其能儒也。自古皆有治。亦莫不有亂。治亂之來。非天降地出。直根夫君臣得失之歸爾。若二帝三王之盛。有治而無亂。不待講而白。孤秦五季。又無足道者。繇漢以迄于唐。其君有欲治之君。而無治臣。或臣得矣。而君失之于上。與夫君臣一德。號爲至治之極者。此宜就諸君以考也。其歷代史籍之載。各按往古以對。庶覩儒者之用心。

問。鹽于海。利爲最巨。欲利一于上。而絕下之侵也。故防峻而網逾密。自竊鬻私販之弊興。而愚民俱入于罪。甚者或轉而爲盜。至制梃以殺捕。間入死法而不知止。何利之誘人也如是。議者欲天下通行而商焉。則又官之所得。纔關市之算爾。是刑罰可省而利入或無幾。噫。通行傷官。禁止害私。害私滋刑。傷官耗利。若之何其可也。

頌

上文相公生辰頌

某蓋聞昔在宗周。則有若申甫鍾神喬嶽。而克宣四方之澤。粵惟炎漢。則有若蕭相儲精大昴。而終底第一之功。皇天眷宋。思佑眞主。和正之氣。上不爲景星慶雲。殊尤之祉。下不在靈芝屈軼。中華河汾。是生王佐。公翁受純粹。亶爲誠明。入則暢袞謀。裨王體。以躋君子堯舜。出則布上恩。厚民德。以措世于仁壽。方將施澤于無垠。較功于無前。區區周漢之佐。不足爲公議也。惟月孟冬。日僅盈數。實公載誕之辰。謹獻頌以

爲壽曰。

月十爲陽日九爲良河汾之鄉于時發祥是生我公德完道充文乎深厚志乎粹忠出殄強敵入登元輔甘雨早歲和氣綿宇誕辰爰臨幅員一心祈公之壽松筠千尋

銘

鐵漏壺銘

注之涓涓弗舍晝夜節數之正差不容罅作于熙寧庚戌孟夏

序

盧君字序

古之人有所志且戒或寓文銘器以自謹有時而泯也豈若名在己稱于口而終身焉名不徒立具見君子之志善哉盧君之名正臣也其志于忠者歟然正之施不一有諫諍之正焉有論議之正焉有容色之正焉有進退之正焉諫諍之正過中則失亢論議之正過中則傷泥容色之正過中則太剛進退之正過中則近僻若是不得中之助亦不足云也故名既定朋友之間又爲字以稱道使聞而知所表焉予于盧君則友也字君予職請字曰中甫君方屈才佐一邑他日立朝廷事人主使人稱之曰盧某正人也則君之名不虛命又曰正而且得中則予之字不虛表中甫其勉之皇祐三年正月十二日餘杭強某序

吳三班字序

致政宮師杜公。昔爲樞密使。今三班吳君。嘗給事府。其謹廉敏。惠能自得公意。故未嘗以吏視君。間因侍側。命之名曰希遠。公旨必曰。功名事業在希其遠者。而不以近器期君也。今謬字于蒙。請字曰伯強。何則。適千里者。在足力之強爾。否則。跬步不能到。君子之于遠業。亦曰自強而已矣。皇祐五年六月二十四日。友生強某序。

送監征錢宗哲序

人心之仁。均有也。然而不能者。利奪之爾。關征之吏。探囊發篋。索人之隱。其心豈素不仁哉。蓋曰。賞格誘之爾。今有司之令主關征者。月校季比。歲終會其課。視前歲之增減。以爲殿最。課增有厚賞。惟恐搜隱之不至。仁何預我哉。浦陽在婺爲窮山。商旅之過婺者。多道旁邑。故關征之官常病歲課益張其防。伺人之來。間有一觸者。則必傾囊倒篋。算緡而去。譬夫設機待獸。中則不釋。故商旅益不來。常歲之課益不登。獨錢君宗哲之莅是局。其術大抵本仁誼。且曰。籠商之術。在寬不在急。急則吏與商爲表裏。將寡取其賄。而私縱之。寬則商喜輸官。而吏無以爲私計。宗哲持是術。凡商旅之過者。必裁減其數而征之。繇是皆願出其塗。而常歲之課愈登羨。四方之商率稱宗哲爲材官。又浦陽俗善織。凡補吏者。指此邑爲膏潤。其空囊而來盈裝而歸者。前後或相繼。獨宗哲解官去。家儲無擔石。吏負而隨者。皆先世賜書與父祖誥軸。一邑之民。愈以宗哲爲廉吏。宗哲嘗語予。我高祖挈東南之籍歸天子。始有功王室。厥後用直言登科選者。一門凡三人。故家聲大于當世。今我階蔭籍。列冗官。苟使規規歲課。覲賞格之及。寧獨愧吾門。抑豈不貽仁

誼之羞耶。故學不喜章句。仕不圖苟進。惴惴焉唯弗紹家世之烈爲懼。以是宗哲能文善詩。卓然有遠器。噫。能言宗哲之材。而不能知其廉者。四方之商也。能知其廉而不能知其文者。一邑之民也。知材與廉。而復能知其有文且仁者。予也。于其行。并取行商居民之誦以爲序云。至和乙未三月十一日。浦江令強某。幾聖題。

劉君仙尉字序

世治安。則士得伸其蘊而見貴于時。自古奇偉士。或遭世不幸。避寇干戈之際。窮死巖谷之下。而其蘊竟不得伸者衆矣。宋興垂百載。天下號無事。東南之民不識兵革。西北貢享不絕于廷。士遭此時。真治安矣。劉君生綺紈家。旣得爲太平之臣。而名復以世安命。君是名得其實矣。今一命尉武川。武川邑小事簡。固宜以學問自力。異日效古人乘輅上書。一伸于當時。不徒爲江安之士矣。請以伸之爲君字。苟名與字兩得其實。則得不爲虛矣。劉君其勉之。至和二年三月二十七日。浦江令強某序。

送嚴公裕序

每天下詔貢士。而吾鄉應者不下二百人。其選而升禮部者。十二人而已。吾友公裕嘗預焉。旣而十二人者。偕試于禮部。禮部總天下貢士之籍。其數纔三千餘。其選而進于天子者。不下七百餘。公裕弗預焉。議者曰。十五而取一焉。公裕得之。五取一焉。公裕乃失之。豈其命耶。不然。何得于寡取。而失之多取也。爲公

嘗或失也。一旦猝與風濤遇，篙亂楫橫，旣覆厥載，歸而嘆曰：自吾汎大江，而吾舟未嘗危也。今特爲風濤之困爾，豈吾術未至耶？毀楫折篙，不復習舟事。客有笑于傍曰：夫操舟，患不工爾。苟工焉，則之江、之河、之巨海，無不利。寧有利于安流，而敗于驚波哉？子弗汝咎，而尤風濤。今而後，吾將見子不能舟斷港，寧復大江之能絕乎？于是舟者釋然悟，再拜爲客謝。治篙、整楫，舉力于舟事，期于工而止焉。予與公裕別十年矣。今歲詔罷貢士，而公裕自婺過予，道所爲學，則猝然其正矣。出所爲文，則煜然其富矣。殆非予昔別之公裕。然獨所謂取名之術者，若將易而不爲焉。未幾告歸，因語之曰：士患業不精，業苟精，卽于鄉、于禮部、于天子之廷，何試而不可。安有工于其鄉，而拙于禮部哉？今公裕一衲而弛，其亦尤風濤而毀篙楫者歟。寧知無竊笑于傍者。公裕亦幡然悟，再拜爲吾謝而去。

送邵秀才序

予官泗。四方之學者，與其州之士，凡遇予，不言其他，而輒及賦。彼果不能其他，而惟賦之知，固不足怪。苟略其他而止，予以知賦，其待人旣薄，而自處必不厚。而予之于賦，豈好爲而求其能且工哉？偶作而偶能爾。始用此進取，旣得之，方捨而專六經之微，鉤聖言之深，發而爲文章，行而爲事業。所謂賦者，烏復置吾齒牙哉？譬嘗爲盜者，今旣爲良民，有人道向時之爲，必頸漲面赤，惡人之訐也。秀才邵君自楚及門，賜予以書，其間多易。春秋發明聖人之道，無一及前之云者。待人旣厚，其自處果不薄。今還楚，有待于若前者，一爲予辯之。

送向祕丞序

民不見治。其原在州縣之情分。州者曰。縣吾統。事無便不利。檄一下。責縣之必從。縣者曰。縣自有政。檄如予何。事不問當否。一切欲違州。故州病勢削。縣患氣沮。上下交相戾。而民不得見治。儻州可行。縣曰。必不可。行。縣曰。是州曰。非。州忘其勢。縣抑其氣。唯其當而從焉。則上下交相通。而治可見。一賢一否。不能獨治。州縣俱賢焉。而後治。今范公鎮青社。向侯爲屬縣。范公屈廊廟之尊。就一郡。固不識州之所以謂勢也。向侯以台輔之後。領一邑。固不識縣之所以謂氣也。而又向侯志古力學。處事有本末。得天下之賢而事之。范公斂大施小。獲奇材爲官屬。州縣之情。將合如符節。青之民。其見大治。豈止上下相通而已哉。

純甫仙尉正性齋序

室以齋名。無他也。蓋居之者內焉諸心。外焉諸身。藏焉爲萬慮。行焉爲萬事。無不潔齊而居之也。苟身黷于貨。心溺于僞。慮發而不端。事立而不正。獨泰然以居。是有齋名而無齋實矣。純甫名家子。一命尉此邑。因卽署東舊宇。葺以爲齋。六經置諸前。羣史列左右。純甫日居其間。取詩之無邪以秉心。禮樂之中和以治身。易之精微以端慮。春秋之斷以行事。書之洪範以蹈中。其考諸往古。則姦邪雖死。我得以筆誅。忠骨雖朽。我景其遺烈。是無愧于齋實矣。顧其名猶缺。且謬于予。予曰。夫身末也。心本也。性之于心。又本也。性正則心正。心正則其身與事無不正也。宜以正性名君齋。若乃苟華棖桷。苟積圖史。動靜不由于正。則非子所以名齋之意也。

考德集序

熙寧八年六月甲寅。魏國忠獻韓公薨。訃聞。皇帝震悼。追榮送終。皆軼舊典。既葬。親爲製文刻石以褒大之。所以哀寵之意甚厚。自朝廷三事大夫以及四方閭巷之士。婦人孺子知公名。莫不歎息。相與感動顏色。而公所素厚者。則皆匍匐會哭于其堂。或不得往。則瞻望歔歔。寓使人以祭。將葬。又皆爲詩以抒其衷。于是其孤戴上之施且榮。卿士大夫之能盡于公也。既類次上賜錄而爲集。又哀卿士大夫所爲文詩。以屬公之故吏強某而序之。謹名其集曰考德。而言曰。宋興四世。仁宗以恭儉慈仁繼承于上。而公以碩德偉望感會于下。君臣一心。遂被顧託。建萬世之利。定二帝之策。而社稷以尊。人神有主。此其功業與日月並明。與天地並久。雖前世顧命大臣。載在冊書。磊落駿偉者。不能過也。若夫結髮從事。以暨白首。出入將相。垂四十年。深謀遠識。動中機會。忠厚樂易。人化其德。寬而有制。剛而無虐。小心大度。夷險一節。卒能佐佑三后。格于皇天。有勳于王。有功于國。有庸在民。此則前世顧命大臣有不能及也。至于功大而志愈虛。位高而身愈降。多財而愈貧。既老而愈壯。則又合于伊尹之不以寵利居成功。周公之不驕吝。孔子之年彌高而德彌劬。可謂有始有卒者也。公之德業。誅于太常。著在史官。金石有銘。旂常有紀。宜其暴耀震顯。傳于無窮。而某又以爲考德于斯集者。蓋公所最著者。固已溢于人之耳目。至于微言片善。雖一介之寡。有學士大夫終身弗能及者。而公則具有焉。然不可以一言盡也。是集作者非一人。述者非一辭。合而觀之。巨細悉備。後世窺公之全者。繇斯文以求之。不爲無補。則名曰考德。其有不可者乎。公之門人多一時

豪傑之士。而其孤乃獨以此屬于某。豈以某從公爲最久。識公行事爲最詳。而某亦貪于頌述功德。以稱公始終待遇之意。故輒忘其材之淺陋。言之樸鄙。以爲之序。

跋

跋大名縣主簿石亢之東齋卷後

亢之治平間與予令尉元城者也。于是吾兩人者交甚好。其相從未嘗一日不懽也。久之予辟京兆。後亢之喪其親以去。相望千百里之外。竊以爲他時縱得游。豈復如前日之數也。熙寧己酉春。予隨司徒魏國公府來魏。居無何。亢之亦主簿大名。以吾兩人者如逸羽驚鱗。東西奔走。復相逢於茂林滄海。乃其所不意爾。知必散易。得而偶聚之爲難也。故情愈以好。而游愈以密。一日亢之徹腐屋。敞新構。揭以爲東齋。家藏圖史。左右而前後。疎窗淨榻。據依而坐。臥蔭有翠柏之景。濯有小池之流。亢之且不得而獨有。復與予共於此。每幕府無事。未嘗輒舍此以不來也。亢之修潔明俊。自其祖而上二世。連執大政。能俛首州縣。不知其貴家子也。於戲。使亢之而出于先世方盛之時。其附而游也。必苟取勢利。諂言媚道。或因以驕其志氣。寧若今日爲亢之者。無可附之勢。可希之利耶。凡予之相從也。亦曰無所苟而來。正言直道。更益而迭進。則吾兩人共樂于一齋之中。豈不裕如也。

記

漣水軍監轉般鹽倉題名記

海利鹽最爲巨。故法有禁私煮。欲利一于公。而防民之牟也。雖食者必市于官。矧敢商焉。若是官鹽之通流。不可一日而息也。漣水轉般倉受四場之鹽。其石常二十餘萬。以支下淮數州之用。苟出納不謹。則吏得以乘慢。而攘取于其間。般運不時。則民闕其用。而公家之利亦乏。然倉興歷二十有九年。監官凡十有九人。至則能究吏弊。以謹出納。足公利以時般運。而數州之用未嘗一日闕者。何耶。蓋官舉于省。則所得皆材吏。歲滿有賞格。人人思懋力爾。殿省丞張公繇鹽局。權泗倅。某爲獄官。間以獄事詣公。因從容語倉事。且曰。予與同職供奉官和侯議。欲第其官之名氏而誌諸壁。子其爲我記之。某不敢讓。謹記云。年月日具位某題。

湖州德清縣覺華寺藏經記

吾聞聖人之書曰經。荀孟而下不預焉。經常也。蓋言彌天地。亘萬世。可常行之爾。然則經之稱尊矣。而諸佛之書。無小大統名曰經。其尊抑甚矣。吾聖人之書。其言修身誠意。經國家治天下之術備矣。惟賢者能知其說。彼愚者投其書墜諸地。雖千百過之。孰肯一援手以置安處。謂其無益于己也。佛之書。窮死生。論報應。其言曰。今世修某善。來世享某福。今世作某惡。來世獲某罪。其書在前。雖甚愚不敢褻。視必稽首而對之。口不漱不誦。手不盥不執。謂其能罪福于己也。凡數口之家。數家之聚。未有不蓄其書而奉焉。矧浮屠之舍哉。湖州德清縣覺華寺佛之徒曰昭序。自落髮已能悚然服其師之教。既尸寺事。又能募錢若干緡。購其書若干卷。爲髻函鈿軸以華之。復嚴一室。其所謂藏者類而聚焉。故觀者益信嚮。誦者益精進。逮

訖事。以記屬予。予嘉佛之書能信千百歲。今昭序復能尊其師之書。使益信于人。是爲其徒有力于師矣。遂爲記云。至和二年三月二十六日記。

湯陰縣思賢堂記

龍圖閣直學士會稽陸公。嘗爲令湯陰。公去愛留。久而民思。思公不得見。輒寓其情于物。凡過公昔所居堂。必徘徊想像。若有所戀而不能去。今令張漸伯。因民之所慕。榜其堂曰思賢。去年公解常山帥節。移鎮全蜀。過故治邑。邑民歡呼焚香。夾道爭拜馬首。噫。公之不爲邑久矣。雖有餘風遺愛在民耳目。其歡迎而望拜者。未必盡當時之人。猶喜公若是。使其人盡嘗親被公惠。與其方去邑之時。其喜若思。宜如何也。公爲詩以道邑民之勤。漸伯並刊諸石。始公能以善政使民思。今漸伯能名堂以慰民之所以思。民之思止于迹。漸伯能思公所以爲賢而履其實。苟去而他日過此。安知不能使湯陰人如望陸公于前日也。陸公字介夫。名誥。熙寧三年四月初六日記。

重建左藏庫記

大名河北之要處。爲官府。必高臺巨櫓相望。以稱別都之雄。又其聚人也廣。其養兵也衆。金縉泉布之蓄。與夫每歲十七縣常賦之入。海輸而山委。所謂左藏庫者。宜壯而嚴。乃旁雜吏舍。偏隘衙門之側。嘗比舍火。延燎幾殆。今司徒侍中魏國公。居守封國。會主藏吏。白狀願得更造。因按有羨數者。兵幾何。官所自有者。材幾何。曰。兵足吾使。材足吾用。可不賦吾民。而辦吾事矣。一日條所宜改作之狀。請于朝。報可。遂易其

故處而新之。匠出于心，巧隨于目。崇庠廣袤之勢，無一不中度。四無附居，闕爽軒豁，出納之令，不戒自謹。受藏于內者，得以安置如律，而左藏庫屹然雄視一府，非他屋可並。凡爲楹百一十有七，始作于熙寧二年十月丙申，訖工于三年三月丙午。在城巡檢魏繼宗實董役事，奉行規制，無尺寸不如指者。初，河朔饑，天子處公北門，以四路三十四州之人全屬公撫民，歲稔爰及興作，爲政信有先後哉。方公坐廟堂時，聞天下某事有未便，或人以爲便而事未舉，雖去京師數千百里之外，必立罷而卽行之。矧是庫旣在公宇下，又始當騶馭六轡出入往來之道，目擊其陋，且非所宜處，其圖新而侈舊，去彼而就此也，宜慮之已熟。况主吏有請，所以庫成居諸役之先，公特爲字二十門，揭一字，有倫有訓，有司成誦，足以爲官箴云。公以本末俾某書，屢辭不獲聽，故書。熙寧三年四月十一日。

記惡

癸巳歲，予待次吳江親舍，客有過邑下者，動眉睫，搖脣舌，其類則人也。承臺省名朝籍，其貴則士也。卽而見之，彼方鱠鮮鱗以恣大嚼，頂烏紗而曳華袍，極笑言以談時事，將枉道以興賈販。徐而睨之，獨布其帶，若有喪者，叩其端，則曰：親柩在南，今將往矣。噫，聞喪之禮，見星則奔，乃枉道以興賈販，三年不見齒。古之達禮，乃笑言以談時事，衰裳厭冠，孝子之服，乃頂紗而曳袍，七日水漿不入于口，乃鱠鱗而恣嚼。於戲，今蚩蠢之氓，有一以非孝抵罪，爲吏者必瞋目而怒，扶之，唯恐不加毒，戮之，唯恐不加嚴。若之何使斯人之徒坐廳事，以風細民，不殿親而胥效幸矣。尙安張國家孝治之本哉。將置之以不孝之刑乎，則予非立朝

者將讓之以名教之罪乎。則禽憤不知愧。第陰憤而默誅。作記惡云。

舉詞

判官舉詞

本官行實吏資。爲衆推與。自主幕畫。舉有所長。觀其政能。無施不可。

推官舉詞

本官精明謹廉。敏于從事。他日采用。必有可觀。

代王龍圖舉李國博詞

伏觀郡人國子博士李庠。操守堅正。博極墳史。塵游不雜。風度自遠。孝友行誼。推高鄉黨。屢辟藩臣。幕府邊事。尤所通曉。與之論議。實有深識。亦旣倦仕。方退里閭。急才之際。庠不可失。

考詞

盱眙周尉忻第二考詞

夫志大而位卑者。謂小官不足效。往往職從而弛。前件官位以文進。道爲位屈。官修而職舉。其志何患不伸哉。政成再葺。直書無愧。

招信馬主簿第一考詞

夫已嘗爲之。而使治其所嘗爲者。疾苦必知焉。前件官列于搢紳。深悉民事。故主簿于一邑。而一邑之民

賴焉。政雖朞月已足稱能吏。

臨淮李縣尉第三考詞

官無巨細。材患不塞職。瀕河之地。寇賊多有。尉無他爲。捕寇其職。前件官悉力乃事。寇亦衰滅。三載書績。于職無愧焉。

王司戶第一考詞

戶掾之職甚卑。而其事不得專。視糾之與奪。以爲可否。雖有過不至大咎。前件官欲善其職。而小累焉。勉哉自力。以圖後效。其考可書中中。

杜主簿第三考詞

前件官勾稽一邑。告政三年。成績可嘉。直書無愧。其考可書中中。

聶司法第一考詞

法之大原。緣情而度中。及弊者去之。或刻而好深。或寬而務出。前件官舉得中道。可謂能吏。效局一載。無愧直書。其考可書中中。

盱眙周縣令第一考詞

夫與民親。而其責備者。無若爲邑。積日累資之制行。而昏懦貪墨者得以進。故民殃而政弛。朝廷患其然。間下新格。須舉乃用。前件官由舉得邑。悉力于政。葺歲成效。其往孰量哉。其考可書中中。

馬主簿第二考詞

前件官佐令再歲。情與民通。冤枉疾苦。必卽而告。其考可書中中。

招信馬主簿第三考詞

夫主簿之于邑。唯才者能究政之是非。與令議可否。其次不越。勾稽簿書。足以保無過。前件官椽邑三載。訖無敗事。秩滿而去。弗愧直書。其考可書中中。

推官第一考詞

前件官操履純潔。識度沈遠。自賓幕席。密有嘉畫。不求聞于人。而薦者交許。其材也歟。政已及暮。直書無愧。

盱眙周縣令第二考詞

百里之邑。有民與社。民之休戚。繫令之才否。前件官爲邑再歲。究心乃事。職修民豫。無愧直書。其考可書中中。

牒詞

賈釋充堂長牒詞

稽于衆。求學行完懋。而可以爲諸生長者。咸以前件人爲言。迺詢羣議。以補斯職。其勉力以贊學者。益副諸生之所望。

楊祖益充學錄牒詞

學錄于一學之士無不與。凡齒于生員者。又得以佐學官而教諭之。其責甚重。不可委非其人。前件人經明學充行信鄉里。而諸生比名合議。請補斯職。爰稽衆言。俾錄學事。

李常充學計牒詞

學計主出納用度。其職近于有司。雖然。非得樸茂廉實之士。則職墮而弊生。前件人性潔文敏。衆謂可委。他日從政。其肯忽有司之守乎。

劉大雅充典客牒詞

前件人學術該敏。儀矩修飾。賓客之事。可使主之噫。赤也立朝。聖門所取。雖在庠序。其可忽諸。

王新轉孔目官牒詞

前件人能法而吏。庀司有年。茲以序升。良允衆議。勉幹乃職。以圖厥終。

秦恭等補官牒詞

前件人廉以飭己。勤以服事。出入公府。能底無過。歲月既久。茲用序遷。宜勉爾勞。以圖成效。

祠部集卷三十四

祝文

皇帝登寶位告諸廟祝文

荷慶基之託。踐皇極之尊。祇率先猷。敢忘遺命。用孚神聽。其體予衷。並薦吉蠲。邇來顧享。

南郊禮畢祭神祝文

謹以清酌庶羞之奠。致祭于某神。國家以上帝訖饗。人神均慶。凡在祭典。徧秩明祀。神其歆承。以對詔意。尙饗。

明堂前祭告千里內諸神祠祝文

國家嗣講聖享。禮物具庀。辛月維吉。將展熙事。預孚神聽。宜有以相之。尙饗。

扁鵲神應公廟挂牌祭告祝文

神以醫妙前世。實爲後世之賴。天下之言脈者。必稽焉。昔我文考。日嘉遺功。追進公爵。肆朕纘極。不敢怠先帝之命令。新厥廟榜。而致祠于神。聿來歆承。永孚庀于後人。尙饗。

泗洲龍王祝文

告于某神曰。惟泗介淮。汴之間。以爲州。今二水交激。幾圯城堞。勢進不已。則州民之命。未可保也。刺史憂

民之憂以告神。神職在水事。宜察刺史之憂。以爲民之福。使水平堵。廟食無愧。尙饗。

代祭水平王祝文

告于某神之靈。曰。農訖力于畎畝。苗未暇穫。而雨久不止。疲農之力。殆敗于垂成。則國之租稅。與神之享。祝將無以供給。神食此土。見民之急。而必加救焉。使陰霾廓然。農得以斂穫。永永廟食。宜無愧也。伏惟尙饗。

代王龍圖祈雪文

歲云窮紀。氣則長陽。願宿麥之待滋。恐新年之作癘。農憂于野。緣早曠之相仍。神食此方。宜感休之與共。矧曰聰明之德。實參造化之權。願乘臘天。速降時雪。啓田疇之有望。銷疫疹于將然。豈專神休。兼塞尹責。尙饗。

祭文

贈司徒兼侍中龐籍祭文

惟靈以耆德碩望。爲時宗臣。嘉猷偉謨。實相先帝。還印綬以去其位。賜几杖以休于家。進退大方。始終一節。吁嗟故老。不及體貌于生前。稽案舊章。猶得哀榮于歿後。葬事云邁。奠饌爰傾。爾其歆承。體厥嘉悼。尙饗。

贈侍中許懷德祭文

贈侍中許某之靈。嗚呼。唯左右臣衛。嘗一日勤王家。及其死也。猶悼以恤。矧有自踐行伍。迄統禁旅。終始恭庠。垂五十年。予思乃勤。莫此爲久。今祖爾殯。特深朕悲。尙饗。

淑妃董氏贈祭文

故淑妃董氏。以柔明之範。爲後庭之率。以靜端之性。謹中閨之承。允執婦順。參基王化。聿懷內助。曷忘永悼。猶有彤管。可鑑徽蹟。故夫四妃之號。亞后之寵。所以極哀榮之典。而且慰吾懿主之悲也。爾其歆承。祇我休命。尙饗。

祭潘太保文

惟靈資略沈毅。爲時虎臣。久次環衛。終始一節。某頃與公子嘗聯官局。今邑境之內。攢柩在焉。取緣子契。以致薄奠。伏惟尙饗。

祭青州劉元瑜待制文

學有淵源。志存寥廓。憲府橫飛。霜秋一鷲。正論所繫。姦邪膽落。其佐大農。慮精器博。金穀坐計。毫釐較若。屢典劇州。憲平俗樂。聿來帥青。自有方略。勸其民人。載勤耕鑿。束其吏兵。無敢驕矍。惟厥仕官。淹速誰度。始驟中綏。終止延閣。用不及竟。舟藏夜壑。青人哭之。聲動城郭。士林之嗟。才豐報約。追惟昔游。慈恩宴醑。三紀于茲。年契所託。迸淚朔風。寄哀冥漠。庶幾歆承。亦有肴酌。

祭左藏韓則順文

往來塞土。協濟疆事。暑行遇疾。遂報不起。子幼室遠。孤魂異地。後事之責。庶幾盡力。瀝酒以告。其無有憾。尙饗。

祭文學陸先生文

維年月日。具官某。謹以清酌庶羞之奠。恭祭于杭州文學陸先生之靈。某辱先生諸孤命。輒以不工之銘。汙先生墓石。道盛德衆。有所漏而不盡紀。縱紀之。又才弱辭俚。將不能暢其美于無窮。而取貴于後世。是未足爲先生報。而適足負先生也。某始以少年出窮巷。無知而禮之者。先生一見。獨忘其齒之尊。納以爲上客。日規月誘。其後。意未有一日而不繼前時者。旣而某得薦于鄉。得第于廷。州以掾于獄。縣以令于民。莫不去受先生教。而歸拜先生賜也。前年來京師。先生飲以別。徹酒把袂。眷眷有不忍分之色。今某官此。而先生死且葬矣。不得泣送先生之柩。見其入于土中。某之恨何時可已耶。尙饗。

代馮內翰祭田樞密文

天放生公。其必爲時。道德之積。仁義之持。不遐公年。乃奪其施。人事可悼。天理可疑。公未入官。曠懷萬世。孰成于泊。孰敗于弊。涵養闕肆。奚發科制。人始知公。志在康濟。帝嘉奏篇。策公臨軒。筆應大問。江河倒源。講始見本。飛弊至根。人又如公。不獨有志。而且有言。華纓長裾。陟降清禁。言必允蹈。重亦自任。正論所激。諛口隨噤。四海之歎。利澤未浸。乃使三司。乃副樞使。兵哺邦蓄。旣富不匱。民足戎贍。仍縮不肆。匪唯志言。又驗行事。行秉大鈞。峨冠中階。以公取之。如探諸懷。寒暑之診。生理有乖。霖雨弗作。樞躔竟埋。人之悲公。

正以不相。若某之悲。夫豈有量。姻好之末。矧託無狀。瀝酒敝哀。庶公來饗。

代王尙書祭賈魏公文

初公以教師太學生。其後以經術講禁中。始知公道德文學之蘊。充然其闕以茂也。已而長臺府。登皇僚。秉鈞制樞。而百工以職。四裔以寧。又知公經濟輔弼之業。自任乎其重。而有餘裕也。公之去魏。某實承其後。聞三撫魏人。而一煦以恩。魏人德公。若赤子之愛慈父母。訃至之日。塗驚巷嗟。或老幼信持以泣。然後益知公恭己施人。其佐天下之大。而臨夫千里之內。其政之所施。得民心若此。其固也。嗚呼。起儒服至台袞。始終無一毫失道。公其賢矣乎。出入將相餘二十年。六換節旄而卒。公享大國。勇骨強體。幾以壽終。公其具福而無憾矣乎。其所以南望而致哀一奠者。徒以爲國惜老成人。而且慰魏國之悲公爾。尙饗。

代祭范資政文

惟公先識遠業。發于天資。再命京寺。言高位卑。書抵相府。琅琅厥詞。謂治先急。育材練師。位晚自得。言十九施。飛綏諫聯。鋤姦救疵。作尹京邑。權豪沮衰。讒口猶狺。構成駭機。公足一蹈。顛跋弗支。朝爲大尹。暮從小摩。旁顧驚惋。公甘若飴。旣黜而寤。詔旨趣歸。西戎寇邊。兵要執持。朝廷議才。曰公是宜。敵聞公名。膽縮魂飛。相戒以退。無干公威。凱歌言還。參貳衮司。欲主堯舜。期身皇夔。功業未竟。太平始基。

代祭張密學文

嗚呼。厥有木焉。材堪棟梁。而他室是用。不克構乎明堂。與夫賢人器。包經綸。而官止近侍。不及乘乎大鈞。

可同悲而其辛。噫。明堂之不構。豈木之陋。實掄材之弗偶。大鈞之不乘。豈賢之病。實有生之弗慶。惟公業履純正。材謀偉奇。鼎司衰章。陰實與公期。宜而弗爲。其命也歟。俛惟孱弱。姻婭是託。泣遡西風。銷疏酒薄。聊一薦于由衷。慨哲人之不作。尙饗。

祭俞戶曹文

嗚呼。懷姦顯榮。而端善梗閼。不仁永年。而仁反夭。奪嗟嗟叔微。而止于斯。若壽與夭。其偶然歟。將籍已素定。而不一可移。魂也莫詰。孰平予悲。頃愚與君同旅京國。予負宿狂。奏書自直。事久不報。相視以側。旣而洒然喜動君色。春風鮮鮮。遊騎並鞭。秋月娟娟。飲帽對偏。君朝顧我。我暮君邊。一日少闊。怒如經年。富者遠貧。奚啻避寇。君獨親我。忘己之富。寒饑水火。將蹈而就。繫君出力。援手以救。始君調官。版掾赤城。君出銓門。予賀以迎。廣文鄭虔。有唐先生。猶昔官此。實爲君榮。未幾東下。我送于野。餞壺欲傾。別淚盈把。躊躇道傍。意不忍捨。都門獨歸。凄然匹馬。南望寫懷。兩寓音書。曾未我答。君纏中虛。賀客旋踵。弔賓在廬。哀樂反覆。止于月餘。訃音初聞。駭但幾絕。厚德未酬。胡然永訣。殮不哭棺。殯不臨穴。一慟寢門。心焉寸折。將誠以奠。寄哀以辭。嗚呼叔微。知乎不知。尙饗。

祭崔郎中文

嗚呼。一府衣冠。莫盛北門。君實貳尹。質厚氣渾。羣起終議。言寡出口。靜固宜壽。胡然獨否。服金餌石。結憤蓄懟。發而爲疽。往往在背。云胡不然。而有斯疾。以迄不處。公莫之詰。不鄙謂予。可以託孤。予受所託。罔有

弗半灑酒。敝哀魂。知已乎尙饗。

祭致政薛郎中文

嗚呼。德業涵演。氣質渾厚。百未一施。竟虛其有。視如涕唾。省郎州守。時弗我用。矧曰冠綬。褫之以歸。日縱杯酒。人琴俱亡。已則不朽。君有仲氏。母卹于後。尙饗。

代祭安國夫人文

嗚呼。夫人之生。慶門淑質。於赫元宰。曰嬪其室。婉婉其從。祇祇其慄。爲婦伊何。祭職不失。爲母伊何。德均以壹。爵從夫尊。克成厥家。大國斯封。象服載華。被躬者翟。飾首者珈。間朝中宮。前導後遮。命婦孔羣。班莫我差。遘疾素秋。游神紫霞。露濕銘旆。風淒葬笳。宗族號送。爰百其車。奠筵相望。道途咨嗟。生榮沒盛。魂其知耶。伏惟尙饗。

祭齊郡君文

惟靈稟生德門。靜柔令慈。作配君子。母婦是師。貴而從天。顯封是宜。象服魚軒。庶永壺彝。如何奄忽。遂隕淑姿。樽酒肴藪。侑哀以辭。魂克不昧。其願歆之。尙饗。

行狀

龍圖閣直學士、朝散大夫、給事中、充同羣牧使兼知審官東院、權發遣開封府事、上柱國、隴西郡開國侯、食邑一千二百戶、食實封四百戶、賜紫金魚袋李公行狀。

曾祖守澄。任開封府襄邑縣尉。祖珣。贈殿中丞。父陟。尚書屯田員外郎。累贈吏部尚書。公諱中師。字君錫。姓李氏。其先博平人。後徙魏之內黃。又徙京師。今爲京師人。公幼孤。能自刻苦。過成童。已與鄉貢。旣冠。中景祐元年進士第。類得補幕職。便母夫人邊氏養。俛就廣德軍廣德縣主簿。爲令者鄙。一縣賴公以治。居無何。以母喪去官。服除。用制置發運使舉。以真州軍事判官。監蘄州蘄口鎮都鹽倉。課上。改大理寺丞。知開封府鄆陵縣。會歲旱。詔案苗免租。其佐不問可否。一切欲免。公曰。被早有淺深。奈何一切免也。止蠲其可免者。民憤且率衆訴。府反劾公。公鉤得倡者。卽致之罪。由是民吏率服。而尹亦以此知公才也。已而辟公管勾本府檢校庫。宰相薦公文章。召試入等。充集賢校理。判太常院。又判登聞鼓院。遷殿中丞。提點府界諸縣鎮。賜緋魚袋。又遷太常博士。時屬邑多盜。吏不時獲。公爲設方略。躬自督捕。而盜悉就縛。朝廷議加一官。以賞公勞。公辭曰。此提點職耳。冒賞可耶。遂已。入三司爲度支判官。大享明堂恩。轉祠部員外郎。淮南轉運使。改刑部員外郎。復爲判官。度支。遷兵部員外郎。使契丹還。授河東轉運使。面賜三品章服。改二部郎中。召拜三司度支副使。遷刑部。英宗卽位。又遷兵部。尋除天章閣待制。陝西都轉運使。改諫議大夫。始至。兵食不卒歲。公駭因籌。所以轉給。及去。知澶州。而陝部之蓄。已足支數年矣。澶當北使往來之道。乃城庫不壯。公曰。此不足以自衛。且無以夸鄰國。遂增築。斥舊加甕城其上。時出按役。城成。莫不如古制。後北使過。果驚顧發問。接伴以非在設備。特體勢適然。爲對。北使亦稱善。歲滿。入判吏部流內銓。三班院。又判太府寺。今上卽位。遷給事中。京東歉。往安撫一路。使還。留守西京。先是洛吏恬于慢令。官逋省帳。至

有十數歲未追而不發者。公至，卽追而立發之。無一敢緩者。歲率三進牡丹。又府例以百花名會。然花費一出民間。每進花及會作花價必翔貴。民苦歲市。公亟奏罷之。會亦尋廢。入判都水監。權發遣三司。朝廷以公治洛有素。且因洛人之請。特除龍圖閣直學士。復守西京。初洛中旱。開府日。雨輒大作。都人喜。目其雨曰隨車。一日甘露降園亭。取而食之如蜜。寮佐議以瑞聞。公曰。歲穰物和。民不受敵。乃瑞也。此何足道。于是議者慙而止。適辛亥役法下。公善究立法本意。卽推行之。最爲天下先。而天下之行新法者。亦莫不以河南爲準。公前後守洛。歲輒大稔。旣去。或旱。嘆風雹隨起。爲政務先惠愛。故所至必治。而其去必見思也。召歸充羣牧使。兼知審官東院。久之。開封尹以事出境。命公權領府事。早作聽斷。日過中。已庭無留訟。未幾感疾。疾且革。猶條未決事。以屬幕府。翌日遂終。羣牧之正寢。熙寧八年閏四月十四日也。享年六十一。公屢試要劇。無一不修舉。大用謂在朝夕。及其死也。物論尤爲公惜。公性仁。氣溫。平居與人言。唯恐忤物。及當官處事。苟一決于心。雖羣議旁撼不動也。卽有可聽。隨改不吝。若勤職奉法。不以一毫私己。特出于天性爾。初陳丞相執中居守南都。公年妙韻爽。一見公于學。卽許以遠到。及讀公所業。復以早成期公。他日卒用丞相薦得帖職。後果至近侍。丞相薨。始不得美諡。公力爭于朝。遂改諡恭。君子以丞相能知人。公爲能報知己也。公博學善屬文。復喜言當世事。仁宗朝嘗著十三策。號曰裨治以進。天子以爲善。降璽書褒諭。後朝廷有所更爲。往往多如所論者。長于歌詩。頃使契丹。往還得詩百篇。當時殆爲絕唱。凡著文集。奏議五十卷。藏于家。未始輕出示人。故人亦罕有見者。筆札尤妙。得徐浩體。濟以清勁。遂自成一家。孝

子之得銘先墓者。獲公書石。始以爲慰。幸公累階朝散大夫。上柱國。開國隴西爵侯。食邑一千二百戶。食實封四百戶。初娶劉氏。再娶呂氏。封延安郡君。故相中國文靖公之孫。翰林侍讀學士諱公綽之女。相成以法度。蓋有內助焉。生一男。持正。太常寺奉禮郎。亡女一尙幼。餘皆嫁良士。眞州軍州推官羅浹。殿中丞張規。同州朝邑縣令張宰。大理寺丞晏元靖。光祿寺丞呂之問。國子博士陳世修。其婿也。卜以今年五月某日。葬公衛州新鄉縣貴德鄉戒海里。合劉氏之穴。某實佐公羣牧。因得狀。公歷官行事以獻。能文宗公求銘公墓云。謹狀。

祠部集卷三十五

墓誌銘

桂州司法參軍贈太子中允葉公墓銘

君諱某字杲卿。姓葉氏。世爲杭州錢塘人。曾祖諱某。避亂唐季。故名不載。仕牒及錢氏王吳越。祖諱某。父諱某。始受僞爵。後吳越以國歸京師。凡陪臣之從行者。皆受命于朝。獨其父中道以事辭歸。不得命。已而自悼曰。吾悔其可追耶。當擇吾兒之秀。使應舉覓官。他日吾家有天子命士。與身得均耳。君生而穎拔。遂讀書。成父志。凡三試。開封府進士。而考官率以高等處君。訖用嘗試。御前恩授鄭州長史。後司法桂州參軍。慶歷六年十月二十八日。以疾卒。官所年五十九。方君之在桂。有閩人吳謚。死象州。武化縣令謚妻挈二女欲歸閩。至桂。而其妻又死。時本道轉運使杜公祀。在君父子間爲知己。哀吳無所歸。欲妻君二子。君曰。爲子娶婦。豈勢利之取。而舍孤窮耶。從之人以爲義。家故饒財。諸弟用之殆盡。且求異籍。君喟然曰。家道至此。繇吾不能取厚祿。以聚親族。汝曹何咎耶。惟汝欲其寬厚多此類。師事郡人林先生逋。先生篇翰爲當時二絕。君盡得其妙。天禧末年。錢塘有巨石浮于江。太守異之。卽問先生。此何祥也。未有以對。先生以問君。乃按讎子五行志以應。曰。其爲萬乘之憂乎。未幾真宗棄天下。於是益服君多聞。而始知讎子之志爲奇書。君早以經術自任。晚傳其學於二子。二子者。昌言。祕書丞。昌齡。尙書屯田員外郎。同年取進士。

第皆有學行政術。知名士林間。次子先登朝。始用祀明堂恩。贈君光祿寺丞。累至太子中允。君配宋氏。封萬年縣太君。三女長適漳州判官周彭孺。次適常州司理參軍晁端仁。季適邵武縣尉徐簡孫。君初與英宗同諱。沒後凡若干年。追改今諱。二子於某同年生也。既卜以某年月日葬君錢塘縣履泰鄉北山之原。因以銘屬其銘曰。

有寶於此。積勤蓄久。三出以鬻。不豐厥售。衆人之得。君獨無有。維其不偶。是以有後。

尙書都官郎中盧君墓誌銘

皇祐二年冬十一月十九日。將葬贈尙書都官郎中諱諮于濰州昌樂縣長壽鄉鳳林里祖塋之庚地。公子泗守比部郎中某。召屬吏司理參軍強某語之曰。吾父世濰人。累以明經舉鄉里不第。因太息曰。士之仕也。欲行道。其進也。欲及時。吾時過矣。吾道不行矣。寧若教吾子以成吾志。乃授予以經。不復言仕進。間常語子曰。夫經豈空言哉。居者守以治其身。仕者傳以行于事。吾止得治身之效。而不及行事之深切。汝齒尙幼。汝學不已。二者俱享焉。予懼不能成吾父之志。故夙夜強學以自勉。一舉而中第。比予登朝。而吾父死矣。始用郊祀恩。贈爲大理評事。累贈至今官。卒時年五十三。人皆謂善有餘而壽不足。今也將葬。子其爲我銘之。某再拜曰。唯。銘曰。

公生孔艱。宜伸而蟠。志卒乃完。子榮公官。公宅旣安。公後其蕃。

尙書虞部郎中曾府君夫人廣陵縣君朱氏墓誌銘

皇祐五年春。晉江曾公諱濬。由殿中丞知蘇州吳江縣。是年冬十有一月八日。喪其夫人廣陵縣君。天長朱氏。夫人于某爲外姑。既哭。夫人于其官舍。明年春。公遣二子奉其喪。往窆杭州之天竺山。某又得相其終事。後十三年。殿丞爲虞部郎中。卒知光州。卜以某年月日葬鄭州之新鄭。二子者。復遷夫人之柩。自杭來合葬。夫人之考。諱巽。嘗擢眞宗朝高第。後爲兵部侍郎。贈某官。夫人生而其父已顯。又極爲其親之所愛。目所習見者。盡富貴也。身所常享者。盡豐佚也。入門事舅姑。能左右不懈。歲時賓祭。必嚴服潔具。不敢後諸婦。若素歷艱難。然方其夫在州縣。而食客常滿坐。用一不給。輒陰嚮奩中所有而辦之。其享之而退者。無不腆之語。入而其夫無不足之色。若慣處匱約。然弗煩傅姆之教。而女功善。不失上下之權。而家道得。皆天性之所自有也。二子者。用其世父丞相竟國公蔭。孝綽。今爲光祿寺丞。孝總。太常寺太祝。女三人。某其最長。壻次嫁衛尉寺丞王謙。次嫁殿中丞杜灑。于其葬也。某又得銘其墓曰。嗟。夫人性慈祥。式母婦宜壽域。四十四奄云亡。先旅葬于南方。後踰紀合夫藏。

汝南周氏夫人墓誌銘

夫人餘杭周氏女。二十嫁郡人朱有安。入門主饋。上下相慶。翁姑曰能孝我。僮媪曰能仁我。閨房雍雍。樂得賢婦。朱氏素貧約。夫人治生頗力。家用是豐。給生男四人。宗顏、宗孟、宗閱。皆富而有守。其一曰仲琪。爲比邱有律行。女三人。長適姚宗雅。次並幼。夫人年五十六。至和二年十一月二十一日。以疾終。靜柔淑祥。性酷嚮佛。朝不茹葷。逮隕弗變。遺命諸子。嚮廬中所有。以飯浮屠。其真所爲好善者歟。將以明年三月二

十一日。窆履泰鄉顯明寺之山圃。諸孤來乞銘。因銘曰。
夫哭順婦。子號慈母。弗衍厥齡。而德有裕。

將仕郎守杭州文學參軍陸先生墓誌銘

嘉祐六年夏四月丁巳。先生陸氏卒。其子求古。章、革、覃、有方。逢休將以其年十月己酉。合其母夫人蔡氏。履泰鄉龍井村之封以葬。六孝子者聚泣以議。吾父蓄道淳德。生七十有六年。其蘊不得久施于時。死矣。獨世之大夫與鄉人之口有傳焉。且吾父誼應銘。其習予父子間。而應以文字銘吾父者。宜莫如強君。以書來求銘。某因得次以銘。先生諱滋。字元象。歲方童。已自如成人。通毛鄭二詩。易春秋。旣冠。以文辭試鄉舉。一鬻其業。而售有司。母且病不行。後三年復在選。察母面有難別色。先生亦絕口不忍出別語。已而自決。夫仕不獨爲時亦爲親。苟感吾親。而去得仕。如勿仕。吾何爲行哉。時故相陳公堯佐使兩浙。雅待先生厚。手十餘書以遺之。曰行矣。持此足以遊公卿。先生謝不受。公亦不能強。自是頽然自得。顧天地間無足介吾慮者。惟一肆其意于書。不復言進取。凡聖經賢史九流。百家僻異之說無不讀。或引以答客問。必章解句析。卒不差一字。問者退輒服。以爲終年讀書。不如與陸先生一日語。尤嗜風雅。日哦樹石間。有以家事關先生者。急麾之使去。曰吾方作詩。無溷我。皇祐四年詔錄先朝遺士。搢紳縫掖合百餘。以狀白府。請用先生。塞詔。府上之朝。得杭州文學。先生捧告喜。自以不出屋廬間。天子就官我。又獲掾于父母之邦。抑幸矣。歲時隨州吏趨公府。或憫焉。先生曰。此迹爾。惡屈吾心哉。嘗治居。材且具矣。其隣有以侵我地。給之。

者先生第笑與語。吾忍取券以白汝妄邪。卽爲之縮材。其寬厚多此類。與故人飲。必諧調笑歌。賓主各盡驩。若將樂之不厭然。及賓去。席撤。復以嚴自處。里俗襲吳越僞禮。其甚者至僭惡不可聽。先生爲援典制。家矯而戶正之。此敵遂革。平生所著詩賦文論書誌合二十卷。自就學。至垂沒。目未嘗去書。若先生可謂好古信道。終始自篤。而不變者歟。大王父諱超。以功爲錢氏衢州刺史。王父諱紹。父諱承祖。皆不仕。女二人。皆有歸。銘曰。

嗚呼先生。養璞自少。成而珪璋。訖自能照。唯是羣籍。我考其要。矯革僞禮。俾迨非肖。于時獨行。追古同調。元龜云亡。人哭人弔。濟濟有子。德罔弗紹。於後其門。當大有耀。

安府君妻趙夫人墓誌銘

嘉祐六年十二月九日。大理寺丞知開封府右軍巡判官安君。旣喪其母夫人趙氏于官舍。將以明年四月某日。還葬其州之吳縣靈巖鄉吳山某原。以狀與疏託銘于某曰。不孝不能致封號之榮于父母之存。今死且葬。若婦儀母規。又將泯而不克紀。是重不孝之恨于已窮。君忍不銘吾母耶。某又何可辭。夫人蘇州人。三世無仕者。幼孤。隨母嫁張氏。遂假氏以張。旣長。歸安府君。入門盡婦道。舅姑喜。嘗語之曰。今若善事我。他日當得賢子婦。以爲若幸。已而長子及婚。里人有甚貧者。願以其弟之孤女爲配。府君詳未決。慨然曰。彼欲以遺孤託吾兒。納婦必勢賫耶。第娶無易。府君于是不能奪。已而其婦果賢。卒如舅姑言。府君始娶陳氏。夫人繼之。凡子男三人。夫人出者。長寺丞君也。次翰。早死。次沆。應進士舉。女四人。其三出夫人。

而夫人概視之。雖習于安氏者。不知孰爲孰出也。享年六十八。以病卒。某常愛寺丞君當官不屈倚。而剛介謹廉。以自持。亦夫人內教云。銘曰。

我勤姑嫜。夙夜左右。男女我戒。以順以守。刻此銘辭。以式母婦。

朝奉郎守尚書虞部郎中上輕車都尉賜緋魚袋曾府君墓誌銘。

曾氏得姓最遠。其族散在四方。未聞有顯者。由泉州晉江之曾諱某。始以文學取進士高第。久之。脩撰集賢殿。復有子今丞相僕射充國公。能世科第。既貴。得追贈三代。故自曾大父諱某。逮脩撰累至太師中書令兼尚書令。又命豫楚二國以公其祖父。于是曾氏遂大顯。公諱公望。字武仲。丞相之弟。楚國公第五子。用父任補大廟齋郎。嘗一試進士不中。曰。安能事此求合耶。遂勉調州縣。後數年。主明之鄞縣簿。是時朝廷用兵西方。詔舉材吏可爲縣令關中者。或薦公可任。卽拜衛尉寺丞。知華之渭南縣。由寺丞入遷至虞部郎中。由渭南歷僉書寧海奉國兩軍節度觀察判官事。去持楚國太夫人喪。服除。知舒州桐城。改蘇州吳江縣。知忠州。通判江州。遷光州。以卒。公囊蓄智慮。視天下事無難者。僅縷出罅見。措之行事。人固以爲不可及。渭南豪家置磴。以擅水利。歲旱一勺。不以與人。公至卽破磴渠水。使得與衆共。凡溉民田千頃。杭州江堤壞。水勢極悍。一州恐。當立辦堤役。諸從事莫可與者。太守以屬公。卽白下諸縣調丁夫。至則富陽人欲亡役。撼衆。公鈎得唱者。摔致之罪。衆懼且力。堤亟成。有詔褒諭。忠州民負官鹽十七萬。有破產不足以償者。或負者死。至子孫。猶償不釋。公奏罷之。仁宗朝寬卹諸道民力。遣公江西。多稱上旨。治平二年。權

蔡饑公適爲光州流民聞仁政日輟其境募富家出倉實以食之人活數百萬煦窮卹弱一郡視公猶父母明年正月二十一日以疾卒于官凡闔封之人與旁郡之饑民食于光者哭數日不絕聲嗚呼公仁若此而壽止五十七官不過一州守豈其命耶其臨下氣嚴色厲若觸之立蹈于咎而中實寬然以恕與人交誠至誼篤滋久不壞雖甚愛物彼挈之以去不問又天性強記文字一經目輒終身不忘好談前史事歷歷如指掌善刑名書或問某事若是法何如曰某事應某法聞者服其精嘗著軍政備覽二十七篇摭諸家兵法爲之說觀其方略三軍可將凡材之可用世者卒不一施其可悲也已娶朱氏封廣陵縣君兵部侍郎贈某官巽之女靜柔淑明先君十三年卒子男三人孝綽光祿寺丞孝總太常寺太祝孝縕太廟齋郎女六人長適某次適衛尉寺丞王謨次適殿中丞杜譔餘尙幼公之在吳江夫人卒焉遂葬杭州之天竺山及公葬有日孝綽與其仲弟遷夫人之柩自杭至乃以某年某月某日合葬鄭州新鄭之某原銘曰

公初起家父蔭是承中則已致乃終有稱公在郡縣害寢利興豪奪爾破衆搖爾懲釋其負逋如解急繩哺厥飢口數不可勝惠于民人義于友朋裕其在己霈然自增強其在天則莫我能亶有餘祉後人是膺

贈衛尉卿梁公夫人李氏墓誌銘

戶部侍郎梁公諱某之冢婦衛尉卿諱某之夫人姓李氏其考諱著有寵真宗朝至濠州刺史緣藩邸之舊前後賜予甚渥家以富盛夫人年十六歸梁氏方是時侍郎議審刑院及其季舒國公在翰林爲學士

合處京師。族大用紉。夫人入門。能服勞。履約如素習然。事舅姑。終日無惰容。撫諸子。人莫知爲嫡庶者。衛尉愛客樂施。每鬻奩中物以佐之。其來而享之于外者。人稱所欲。入而其夫不見不足之色。率不知費自奩中出也。衛尉喪。不衣采食葷。以此終身焉。一日感疾。語諸子曰。七十人壽罕至者。矧吾年又加二。吾死何憾。獨乃父有志無命。不克大耀以死。吾所慊然者。如有待于後。汝曹其勉諸。語訖不起。嘉祐五年六月九日也。夫人喜釋氏書。且深探其理。能頽然委順。不惑于死生之際。豈非效歟。夫貴封永安。上黨二縣君。後以子改封贊皇縣太君。子男八人。曰訪。湖州德清縣令。卒于官。曰詠。今爲太子中舍人致仕。曰詢。今爲尚書比部員外郎。曰彥。世今爲廣安軍岳池縣令。曰誦。曰諮。並郊社齋郎。曰諷。梧州司理參軍。曰翊。鄆州壽張縣尉。皆早卒。女九人。長嫁試將作監主簿李貫之。次嫁尚書屯田員外郎王衛。次嫁進士郭宗道。次嫁右班殿直張侗。次嫁進士武孜。餘未嫁早卒。熙寧四年九月甲午。葬夫人鄆州須城縣登庸鄉調鼎里望南山之南原。祔衛尉卿之兆。銘曰。

來儀大家。雖離其鳴。仰肅俯順。婦道以成。宜爾君子。卒至正卿。盛服文軒。始從夫榮。子籍在朝。顯封載更。壺則不外。有聞維聲。孰曰男子。獨後有名。請視銘章。以較重輕。

太常少卿楊公夫人福昌縣君王氏墓誌銘

太常少卿楊公諱某之子。曰元崇。元忠。將葬母夫人福昌縣君王氏于某縣某鄉其原。合太常公之兆。以某聯姻。聞夫人宜最詳。願有銘諸壙。噫。某故聞其賢矣。方其歸楊氏也。太常蓋嘗娶謝氏生二女矣。夫人

視之如己出。比夫人二男生。其愛行男女間。未能有以毫髮窺厚薄者。後女嫁。至謁匳中。所有贍費。且王氏故顯。祖樸。贈中書令。父球。任尚書兵部員外郎。夫人獨能忘貴驕之習。奉其夫以禮。入門主饋。無一日輒懈。太常卒登州。護其喪以歸。非臨哭與祭。未嘗不勉子于學。以故二子皆有文。元崇前大名府內黃縣尉。元忠太廟齋郎。某始見夫人于堂上。環立而左右者。無一有惰容。既知其得家節也。及其亡而往奠。婦媵皆哭盡哀。知其能以仁逮下也。夫人達佛理。故死無怛惻。樂施與。故斂無餘服。得不謂賢也歟。享年六十三。熙寧四年十二月甲子以疾卒。其葬以明年三月某日。其封君福昌也。繇太常登朝用郊祀恩云。銘曰。

事生送死。盡禮君子。出異愛均。鳴鳩之仁。維武懿德。母婦之式。

權大名府朝城縣主簿陳君墓誌銘

君諱肱。字叔良。洪州武寧陳氏子。生而偉嚴。貌似仲尼。衆目爲陳夫子。然其中亦自信不苟。讀書務通大義。其爲文。贍而有制。舉進士。中皇祐元年第。釋褐鄂州江夏縣尉。遭母喪去職。服除。主舒之懷寧縣簿。又司法大寧監。未滿去持父喪。既又權寧國軍節度推官。後補安州雲夢縣令。未赴而縣廢。改大名府朝城主簿。缺。君曰。是亦爲祿。乃絀其資以就。久之。留守韓魏公知其賢。本道都轉運使。繼以事。誘君。且交稱君爲才。未及薦。熙寧四年春。役夫漳河。君部役河上。四月朔。得疾以歸。經三日。遂卒。享年五十三。貧。未克舉葬。權窆浮屠舍。後四年。長子碩扶其柩歸。以某年月日葬。君先塋之次。大略君爲吏敏于舉職。其行己廉。

于自進。其在寧國也。是州之寄倉蕪湖者。于出納爲最劇。監司之委主吏。常艱其選。凡前後兩屬君。一切務去宿弊而斛有餘數。其在江夏也。歲凶多盜。君捕無遺類。掾曹忌其功。悉從末減。故盜得不死。賞典亦從而殺。或不平之。君曰。捕盜尉職爾。必欲害彼以利我。豈吾心哉。于是忌者聞以愧。初君之主簿懷寧也。考試黃州進士。得今太子中允孫公素賁程文。讀之喜。卽擢爲第一。明年公素登進士甲科。且名在第八。後籍籍爲聞人。于是人莫不以識鑒推君。而君亦以此自負。公素報君甚厚。君死卹其家。以其弟員娶君之孤女。後君之所以得歸葬其鄉。皆公素力也。君子知言。可謂無負矣。然士大夫猶爲惜者。獨無位與年不及少紓其蘊耳。君曾祖諱某。祖諱某。父諱某。皆不仕。娶余氏生二男。曰碩。砥。一女。孫氏婦也。銘曰。嗟夫。君命孰使。莫或行輒。此止用慊。心術足已。得一賢享。衆美貽後。慶在二子。宅新宮安。故里嗟夫。君茲已矣。

遺事記

尙書司門員外郎李君墓誌遺事記

尙書司門員外郎李君旣葬之明年。其嗣子鎬。自雍以書至京師。謂余曰。先君之葬。端明王公實銘其墓。當時遺其可書者數事。鎬食不下咽者亦旣一年矣。今得盡書之以碣諸墓。遂使先烈不泯于後。鎬無愧爲人子矣。乃從而爲之書。君初監密州稅。一日。同職爲大商所給。閱貨不以實。將稍隱其數以曲減征算。君固執不可不聽。遂往白州守。時蔡文忠公守密。特多君而沮其同職者。復器以爲能吏。由是知名。一郡

無敢以少年視君。後爲縣崑山。有監酒楚豫者。貧甚。能以廉自處。君憐之。先是縣圭田。獨酒官無有。君議斥己田百畝。主簿尉各半之。以割隸酒官。莫不以君議爲當。至今爲例不改。嘗與尉同得僞印。尉圖免遠官。願獨以爲己。獲君一聽。尉便訖不復自言。後州守柳公植。轉運使葉公清。臣聞之。交稱斯二事。皆刻己以與人。亦常情之難能者。鄭文肅公爲杭守。辟君幕府。州事多所倚辦。公移雍。而代者宿望于公。輒鉤撫公短。同幕吏有雅不爲鄭禮者。請索公庫副歷。以尋其隙。代者悅。明日果索副本。君曰。庫有正歷。奚用副爲。前此毀之矣。代者無所得。旣而歎曰。天休雖去。此幕中猶有人焉。吾無能爲已。復從辟京兆。謁丞相呂文靖公于都下。見之喜。意將用君。未幾且坐事。方是時。朝廷專以文法升絀天下士。一跌遂不復振。君明果有餘。而智慮無不足者。遇事無問難易。而一切敢爲。使君而得至于今之時。棄瑕以錄可用之才。挾術舒蘊。馳騁從事于其間。其進而取功名也。未易可度。嗚呼死矣。豈其命歟。君諱某。字景仁。若世次。閱閱行治。則具王公銘序云。熙寧六年十月十七日。